




大佛頂首楞嚴經

小萬柳堂寫本
卷第一至卷第五







桐城女子吳芝瑛寫本



大佛頂首楞嚴經

候官嚴復署檢





一	轉	允	立
切	大	釐	我
堅	法	百	國
固	輪	度	憲



小 萬 柳 堂 寫 經 圖


惠卿公免屬題其德配

芝瑛夫人手書楞嚴經卷子

多才真墮落何術堪自度云何

詢汝隨正坐高名故謝庭傳家學

四海驚祿絮工書亦茂倚簪花足



天趣傷心古懷抱好事表秋墓
誰知挂彈車雖解有餘怖寫
經信宏願佛力必濟護因思起
浮圖更借湖山助世人方造業自
謂殊不誤是非置勿辨功德積

有素書成定圓滿巧腕生妙悟
他年比彩鸞唐韻難獨步

孝肯



宣統元年閏二月初一日

大佛頂如來密因修證了義諸菩薩萬行首楞嚴經
卷第一

唐天竺沙門般刺密帝譯

烏菴國沙門彌伽釋迦譯語

菩薩戒弟子前正議大夫同中書門下平章

事清河房韋受

清桐城女子吳芝瑛寫本

如是我聞一時佛在室羅筏城祇桓精舍與大比丘
眾千二百五十人俱皆是無漏大阿羅漢佛子住持
善趣諸有能於國土成就威儀從佛轉輪妙堪遺屬

巖淨毗尼弘範三界應身無量度脫眾生拔濟未來
越諸塵累其名曰大智舍利弗摩訶目犍連摩訶拘
絺羅富樓那彌多羅尼子須菩提優波尼沙陀等而
為上首復有無量辟支無學并其初心同來佛所屬
諸比丘休夏自恣十方菩薩密決心疑欽奉慈嚴將
求密義即時如來敷座宴安為諸會中宣示深奧法
筵清眾得未曾有迦陵頻音徧十方界恒沙菩薩來
聚道場文殊師利而為上首時波斯匿王為其父王
諱日營齋請佛宮掖自迎如來廣設珍羞無上妙味
兼復親延諸大菩薩城中復有長者居士同時飯僧

楞嚴經卷一第二葉

仙佛來應佛勅文殊分領菩薩及阿羅漢應諸齋主
唯有阿難先受別請遠游未還不違僧次既無上座
及阿闍黎途中獨歸其日無供即時阿難執持應器
於所游城次第循乞心中初求最後檀越以為齋主
無問淨穢刹利尊姓及旃陀羅方行等慈不擇微賤
發意圓成一切眾生無量功德阿難已知如來世尊
訶須菩提及大迦葉為阿羅漢心不均平欽仰如來
開闡無遮度諸疑謫經彼城隍徐步郭門巖整威儀
肅恭齋法爾時阿難因乞食次經歷婬室遭大幻術
摩登伽女以娑毗迦羅先梵天呪攝入婬席娑躬撫

摩將毀戒體如來知彼媿術所加齋畢旋歸王及大
臣長者居士俱來隨佛願聞法要於時世尊頂放百
寶無畏光明光中出生千葉寶蓮有佛化身結跏趺
坐宣說神呪勅文殊師利將呪往護惡呪消滅提獎
阿難及摩登伽歸來佛所阿難見佛頂禮悲泣恨無
始末一向多聞未全道力殷勤懇請十方如來得成
菩提妙奢摩他三摩禪那最初方便於時復有恒沙
菩薩及諸十方大阿羅漢辟支佛等俱願樂聞退坐
默然承受聖旨佛告阿難汝我同氣情均天倫當初
發心於我法中見何勝相頓捨世間深重恩愛阿難

楞嚴經卷一第三葉

白佛我見如來三十二相勝妙殊絕形體瑩徹猶如
琉璃常自思維此相非是欲愛所生何以故欲氣粗
濁腥臊交遺膿血雜亂不能發生勝淨妙明紫金光
聚是以渴仰從佛剃落佛言善哉阿難汝等當知一
切眾生從無始來生死相續皆由不知常住真心性
淨明體用諸妄想此想不真故有輪轉汝今欲研無
上菩提真發明性應當直心誦我所問十方如來同
一道故出離生死皆以直心心言直故如是乃至終
始地位中間永無諸委曲相阿難我今問汝當汝發
心緣於如來三十二相將何所見誰為愛樂阿難白

佛言世尊如是愛樂用我心目由目觀見如來勝相
心生愛樂故我發心願捨生死佛告阿難如汝所說
真所愛樂因於心目若不識知心目所在則不能得
降伏塵勞譬如國王為賊所侵發兵討除是兵要當
知賊所在使汝流轉心目為咎吾今問汝唯心與目
今何所在阿難白佛言世尊一切世間十種異生同
將識心居在身內縱觀如來青蓮華眼亦在佛面我
今觀此浮根四塵祇在我面如是識心實居身內佛
告阿難汝今現坐如來講堂觀祇陀林今何所在世
尊此大重閣清淨講堂在給孤園今祇陀林實在堂

楞嚴經卷一第四葉

外阿難汝今堂中先何所見世尊我在堂中先見如
來次觀大眾如是外望方矚林園阿難汝矚林園因
何有見世尊以大講堂戶牖開豁故我在堂得遠瞻
見爾時世尊在大眾中舒金色臂摩阿難頂告示阿
難及諸大眾有三摩提名大佛頂首楞嚴王具足萬
行十方如來一門超出妙莊嚴路汝今諦聽阿難頂
禮伏受慈旨佛告阿難如汝所言身在講堂戶牖開
豁遠矚林園亦有眾生在此堂中不見如來見堂外
者阿難答言世尊在堂不見如來能見林泉無有是
處阿難汝亦如是汝之心靈一切明了若汝現前所

明了心實在身內爾時先合了知內身頗有眾生先見身中後觀外物縱不能見心肝脾胃爪生髮長筋轉脉搖誠合明了如何不知必不內知云何知外是故應知汝言覺了能知之心住在身內無有是處阿難瞽首而白佛言我聞如來如是法音悟知我心實居身外所以者何譬如燈光然於室中是燈必能先照室內後其室門後及庭際一切眾生不見身中獨見身外亦如燈光居在室外不能照室是義必明將無所惑同佛了義得無妄耶佛告阿難是諸比丘適來從我室羅筏城循乞擣食歸祇陀林我已宿齋汝

楞嚴經卷一第五葉

觀比丘一人食時諸人飽不阿難答言不也世尊何以故是諸比丘雖阿羅漢軀命不同云何一人能令眾飽佛告阿難若汝覺了知見之心實在身外身心相外自不相干則心所知身不能覺覺在身際心不能知我今示汝兜羅綿手汝眼見時心分別不阿難答言如是世尊佛告阿難若相知者云何在外是故應知汝言覺了能知之心住在身外無有是處阿難白佛言世尊如佛所言不見內故不居身內身心相知不相離故不在身外我今思維知在一處佛言處今何在阿難言此了知心既不知內而能見外如我

思忖潛伏根裏猶如有人取瑠璃椀合其兩眼雖有
物合而不留礙彼根隨見隨即分別然我覺了能知
之心不見內者為在根故分明曠外無障礙者潛根
內故佛告阿難如汝所言潛根內者猶如瑠璃彼人
當以瑠璃籠眼當見山河見瑠璃不如是世尊是人
當以瑠璃籠眼實見瑠璃佛告阿難汝心若同瑠璃
合者當見山河何不見眼若見眼者眼即同境不得
成隨若不能見云何說言此了知心潛在根內如瑠
璃合是故應知汝言覺了能知之心潛伏根裏如瑠
璃合無有是處阿難白佛言世尊我今又作如是思

楞嚴經卷一第六葉

維是眾生身腑藏在中竅穴居外有藏則暗有竅則
明今我對佛開眼見明名為見外閉眼見暗名為見
內是義云何佛告阿難汝當閉眼見暗之時此暗境
界為與眼對為不對眼若與眼對暗在眼前云何成
內若成內者居暗室中無日月燈此室暗中皆汝焦
腑若不對者云何成見若離外見內對所成合眼見
暗名為身中開眼見明何不見面若不見面內對不
成見面若成此了知心及與眼根乃在虛空何成在
內若在虛空自非汝體即應如來今見汝面亦是汝
身汝眼已知身合非覺必汝執言身眼兩覺應有二

知即汝一身應成兩佛是故應知汝言見暗名見內者無有是處阿難言我嘗聞佛開示四眾由心生故種種法生由法生故種種心生我今思維即思維體實我心性隨所合處心則隨有亦非內外中間三處佛告阿難汝今說言由法生故種種心生隨所合處心隨有者是心無體則無所合若無有體而能合者則十九界因七塵合是義不然若有體者如汝以手自捏其體汝所知心為復內出為復外入若復內出還見身中若從外來先合見面阿難言見是其眼心知非眼為見非義佛言若眼能見汝在室中門能見

楞嚴經卷一第七葉

不則諸已死尚有眼存應皆見物若見物者云何名死阿難又汝覺了能知之心若必有體為復一體為有多體今在汝身為復徧體為不徧體若一體者則汝以手捏一支時四支應覺若咸覺者捏應無在若捏有所則汝一體自不能成若多體者則成多人何體為汝若徧體者同前所捏若不徧者當汝觸頭亦觸其足頭有所覺足應無知今汝不然是故應知隨所合處心則隨有無有是處阿難白佛言世尊我亦聞佛與文殊等諸法王子談實相時世尊亦言心不在內亦不在外如我思維內無所見外不相知內無

知故在內不成身心相知在外非義今相知故復內
無見當在中間佛言汝言中間中必不迷非無所在
今汝推中中何為在為復在處為當在身若在身者
在邊非中在中同內若在處者為有所表為無所表
無表同無表則無定何以故如人以表表為中時東
看則西南觀成北表體既混心應雜亂阿難言我所
說中非此二種如世尊言眼色為緣生於眼識眼有
分別色塵無知識生其中則為心在佛言汝心若在
根塵之中此之心體為復兼二為不兼二若兼二者
物體雜亂物非體知成敵兩立云何為中兼二不成

楞嚴經卷一第八葉

非知不知即無體性中何為相是故應知當在中間
無有是處阿難白佛言世尊我昔見佛與大目連須
菩提富樓那舍利弗四大弟子共轉法輪常言覺知
分別心性既不在內亦不在外不在中間俱無所在
一切無著名之為心則我無著名為心不佛告阿難
汝言覺知分別心性俱無在者世間虛空水陸飛行
諸所物象名為一切汝不著者為在為無無則同於
龜毛兔角云何不著有不著者不可名無無相則無
非無即相相有則在云何無著是故應知一切無著
名覺知心無有是處爾時阿難在大眾中即從座起

偏袒右肩右膝著地合掌恭敬而白佛言我是如來
最小之弟蒙佛慈愛雖今出家猶恃憐憐所以多聞
未得無漏不能折伏娑毗羅呪為彼所轉溺於娑舍
當由不知真際所詣唯願世尊大慈哀愍開示我等
奢摩他路令諸闍提憊彌戾車作是語已五體投地
及諸大眾傾渴翹仙欽聞示誨爾時世尊從其面門
放種種光其光晃曜如百千日普佛世界六種震動
如是十方微塵國土一時開現佛之威神令諸世界
合成一界其世界中所有的一切諸大菩薩皆住本國
合掌承聽佛告阿難一切眾生從無始來種種顛倒

楞嚴經卷一第九葉

業種自然如惡又聚諸修行人不能得成無上菩提
乃至別成聲聞緣覺及成外道諸天魔王及魔眷屬
皆由不知二種根本錯亂修習猶如煮沙欲成嘉饌
縱經塵劫終不能得云何二種阿難一者無始生死
根本則汝今者與諸眾生用攀緣心為自性者二者
無始菩提涅槃元清淨體則汝今者識精元明能生
諸緣緣所遺者由諸眾生遺此本明雖終日行而不
自覺枉入諸趣阿難汝今欲知奢摩他路願出生死
今復問汝即時如來舉金色臂屈五輪指語阿難言
汝今見不阿難言見佛言汝何不見阿難言我見如

未舉臂屈指為光明奉耀我心目佛言汝將誰見阿
難言我與大眾同將眼見佛告阿難汝今答我如來
屈指為光明奉耀汝心目汝目可見以何為心當我
奉耀阿難言如來現今徵心所在而我以心推窮尋
逐即能推者我將為心佛言咄阿難此非汝心阿難
矍然辟座合掌起立白佛此非我心當名何等佛告
阿難此是前塵虛妄相想惑汝真性由汝無始至於
今生認賊為子失汝元常故受輪轉阿難白佛言世
尊我佛寵弟心愛佛故令我出家我心何獨供養如
來乃至徧歷恒沙國土承事諸佛及善知識發大勇

楞嚴經卷一第十葉

猛行諸一切難行法事皆用此心縱令誦法永退善
根亦因此心若此發明不是心者我乃無心同諸土
木離此覺知更無所有云何如來說此非心我實驚
怖兼此大眾無不疑惑唯垂大悲開示未悟爾時世
尊開示阿難及諸大眾欲令心入無生法忍於師子
座摩阿難頂而告之言如來常說諸法所生唯心可
現一切因果世界微塵因心成體阿難若諸世界一
切所有其中乃至草葉縷結詰其根元咸有體性縱
令虛空亦有名貌何況清淨妙淨明心性一切心而
自無體若汝執恠分別覺觀所了知性必為心者此

心即應離諸一切色香味觸諸塵事業別有全性如
汝今者承聽我法此則因聲而有分別縱滅一切見
聞覺知內守幽閑猶為法塵分別影事我非勅汝執
為非心但汝於心微細揣摩若離前塵有分別性即
真汝心若分別性離塵無體斯則前塵分別影事塵
非常住若變滅時此心則同龜毛兔角則汝法身同
於斷滅其誰修證無生法忍即時阿難與諸大眾默
然自失佛告阿難世間一切諸修學人現前雖成九
次第定不得漏盡成阿羅漢皆由執此生死妄想誤
為真實是故汝今雖得多聞不成聖果阿難聞已重

楞嚴經卷一第十一葉

淚悲淚五體投地長跪合掌而白佛言自我從佛發
心出家持佛威神常自思維無勞我修將謂如來惠
我三昧不知身心本不相代失我本心雖身出家心
不入道辟如窮子捨父逃逝今日乃知雖有多聞若
不修行與不聞等如人說食終不能飽世尊我等今
者二障所纏良由不知寐常心性唯願如來哀愍窮
露叢妙明心開我道眼即時如來從胸卍字涌出寶
光其光晃昱有百千色十方微塵普佛世界一時周
徧徧灌十方所有寶剎諸如來頂校至阿難及諸大
眾告阿難言吾今為汝建大法幢亦令十方一切眾

生獲妙微密性淨明心得清淨眼阿難汝先答我見
光明奉此奉光明因何所有云何成奉汝將誰見阿
難言由佛全體閻浮檀金瓶如寶山清淨所生故有
光明我實眼觀五輪指端屈握示人故有奉相佛告
阿難如來今日實言告汝諸有智者要以譬喻而得
開悟阿難譬如我奉若無我手不成我奉若無汝眼
不成汝見以汝眼根例我奉理其義均不阿難言唯
然世尊既無我眼不成我見以我眼根例如來奉事
義相類佛告阿難汝言相類是義不然何以故如無
手人奉畢竟滅彼無眼者非見全無所以者何汝試

楞嚴經卷一第十二葉

於途詢問盲人汝何所見彼諸盲人必來答汝我今
眼前唯見黑暗更無他驪以是義觀前塵自暗見何
虧損阿難言諸盲眼前唯覩黑暗云何成見佛告阿
難諸盲無眼唯觀黑暗與有眼人處於暗室二黑有
別為無有別如是世尊此暗中人與彼羣盲二黑校
量曾無有異阿難若無眼人全見前黑忽得眼光還
於前塵見種種色名眼見者彼暗中人全見前黑忽
獲燈光亦於前塵見種種色應名燈見若燈見者燈
能有見自不名燈又則燈觀何關汝事是故當知燈
能顯色如是見者是眼非燈眼能顯色如是見性是

心非眼阿難雖復得聞是言與諸大眾口已默然心
未開悟猶冀如來慈音宣示合掌清心住佛悲誨爾
時世尊舒兜羅綿網相光手開五輪指誨勅阿難及
諸大眾我初成道於鹿園中為阿若多五比丘等及
汝四眾言一切眾生不成菩提及阿羅漢皆由客塵
煩惱所誤汝等當時因何開悟今成聖果時憍陳那
起立白佛我今長老於大眾中獨得鮮名因悟客塵
二字成果世尊辟如行客投寄旅亭或宿或食宿食
事畢俶裝前途不違安住若實主人自無攸往如是
思維不住名客住名主人以不住者名為客義又如

新霽清暘升天光入隙中發明空中諸有塵相塵質
搖動虛空寂然如是思維澄寂名空搖動名塵以搖
動者名為塵義佛言如是即時如來於大眾中屈五
輪指屈已復開開已又屈謂阿難言汝今何見阿難
言我見如來百寶輪掌眾中開合佛告阿難汝見我
手眾中開合為是我手有開有合為復汝見有開有
合阿難言世尊寶手眾中開合我見如來手自開合
非我見性有開有合佛言誰動誰靜阿難言佛手不
住而我見性尚無有靜誰為無住佛言如是如來於
是後輪掌中飛一寶光在阿難右即時阿難回首右

盼又放一光在阿難左阿難又則回首左盼佛告阿
難汝頭今日何因搖動阿難言我見如來出妙寶光
來我左右故左右觀頭自搖動阿難汝盼佛光左右
動頭為汝頭動為汝見動世尊我頭自動而我見性
尚無有止誰為搖動佛言如是於是如來普告大眾
若渡眾生以搖動者名之為塵以不住者名之為客
汝觀阿難頭自動搖見無所動又汝觀我手自開合
見無舒卷云何汝今以動為身以動為境從始洎終
念念生滅遺失真性顛倒行事性心失真認物為已
輪迴是中自取流轉

楞嚴經卷一第十四葉

大佛頂如來密因修證了義諸菩薩萬行首楞嚴經
卷第一

大佛頂如來密因修證了義諸菩薩萬行首楞嚴經
卷第二

唐天竺沙門般刺密帝譯

烏菴國沙門彌伽釋迦譯語

菩薩戒弟子前正議大夫同中書門下平章

事清河房融筆受

清桐城女子吳芝瑛寫本

爾時阿難及諸大眾聞佛示誨身心泰然念無始來
失却本心妄認緣塵分別影事今日開悟如失乳兒
忽過慈母合掌禮佛願聞如來顯出身心真妄虛實

現前生滅與不生滅二發明性時波斯匿王起立白
佛我昔未承諸佛誨勅見迦旃延毗羅胝子咸言此
身死後斷滅名為涅槃我雖值佛今猶狐疑云何叢
揮證知此心不生滅地今以大眾諸有漏者咸皆願
聞佛告大王汝身現在今渡問汝汝以肉身為同金
剛常住不朽為復變壞世尊我以此身終從變滅佛
言大王汝未曾滅云何知滅世尊我以此無常變壞之
身雖未曾滅我觀現前念念遷謝新新不住如火成
灰漸漸銷殞殞亡不息決知以身當從滅盡佛言如
是大王汝今生齡已從衰老顏貌何如童子之時世

楞嚴經卷二第二葉

尊我昔孩孺膚腠潤澤年至長成血氣充滿而今顏
齡迫於衰老形色枯悴精神昏昧髮白面皺逮將不
久如何見比充盛之時佛言大王汝之形容應不損
朽王言世尊變化密移我誠不覺寒暑遷流漸至於
此何以故我年二十雖號年少顏貌已老初十歲時
三十之年又衰二十於今六十又過於二觀五十時
宛然強壯世尊我見密移雖共殞落其間流易且限
十年若復令我微細思維其變甯唯一紀二紀實為
年變豈唯年變亦兼月化何直月化兼又日遷沈思
諦觀刹那刹那念念之間不得停住故知我身終從

變滅佛告大王汝見變化遷改不停悟知汝滅亦於
滅時汝知身中有不滅耶波斯匿王合掌白佛我實
不知佛言我今示汝不生滅性大王汝年幾時見恒
河水王言我生三歲慈母攜我謁耆婆天經過此流
爾時即知是恒河水佛言大王如汝所說二十之時
衰於十歲乃至六十日月歲時念念遷變則汝三歲
見此河時至年十三其水云何王言如三歲時宛然
無異乃至於今年六十二亦無有異佛言汝今自傷
髮白面皺其面必定皺於童年則汝今時觀此恒河
與昔童時觀河之見有童耄不王言不也世尊佛言

楞嚴經卷二第三葉

大王汝面雖皺而此見精性未曾皺皺者為變不皺
非變變者受滅彼不變者元無生滅云何於中受汝
生死而猶引彼末伽黎等都言此身死後全滅王聞
是言信知身後捨生趣生與諸大眾踊躍驩喜得未
曾有阿難即從座起禮佛合掌長跪白佛世尊者此
見聞必不生滅云何世尊名我等輩遺失真性顛倒
行事願興慈悲洗我塵垢即時如來垂金色臂輪手
下指示阿難言汝今見我母陀羅手為正為倒阿難
言世間眾生以此為倒而我不知誰正誰倒佛告阿
難若世間人以此為倒即世間人將何為正阿難言

如來豎臂兜羅綿手上指於空則名為正佛即豎臂
告阿難言若此顛倒首尾相換諸世間人一倍瞻視
則知汝身與諸如來清淨法身比類叢明如來之身
名正徧知汝等之身號性顛倒隨汝諦觀汝身佛身
稱顛倒者名字何處號為顛倒於時阿難與諸大眾
瞪瞞瞻佛目睛不瞬不知身心顛倒所在佛興慈悲
哀愍阿難及諸大眾叢海潮音徧告同會諸善男子
我常說言色心諸緣及心所使諸所緣法唯心所現
汝身汝心皆是妙明真精妙心中所現物云何汝等
遺失本妙圓妙明心寶明妙性認悟中迷晦昧為空

楞嚴經卷二第四葉

空晦暗中結暗為色色雜妄想相為身聚緣內搖
越外轉迷昏擾擾相以為心性一迷為心決定惑為
色身之內不知色身外洎山河虛空大地咸是妙明
真心中物譬如澄清百千大海奔之唯認一浮漚體
目為全潮窮盡瀛渤汝等即是迷中倍人如我垂手
等無差別如來說為可憐愍者阿難承佛悲救深誨
垂泣叉手而白佛言我雖承佛如是妙音悟妙明心
元所圓滿常住心地而我悟佛現說法音現以緣心
允所瞻仰徒獲此心未敢認為本元心地願佛哀愍
宣示圓音拔我疑根歸無上道佛告阿難汝等尚以

緣心聽法此法亦緣非得法性如人以手指月示人
彼人因指當應看月若復觀指以為月體此人豈唯
亡失月輪亦亡其指何以故以所標指為明月故豈
唯亡指亦復不識明之與暗何以故即以指體為月
明性明暗二性無所了故汝亦如是若以分別我說
法音為汝心者此心自應離分別音有分別性譬如
有客寄宿旅亭暫止便去終不常住而掌亭人都無
所去名為亭主此亦如是若真汝心則無所去云何
離聲無分別性斯則豈唯聲分別心分別我容離諸
色相無分別性如是乃至分別都無非色非空拘舍

楞嚴經卷二第五葉

離等昧為冥諦離諸法緣無分別性則汝心性各有
所還云何為主阿難言若我心性各有所還則如來
說妙明元心云何無還唯垂哀愍為我宣說佛告阿
難且汝見我見精明元此見雖非妙精明心如第二
月非是月影汝應諦聽今當示汝無所還地阿難此
大誦堂洞開東方日輪升天則有朗曜中夜黑月雲
霧晦冥則復昏暗戶牖之隙則復見通牆宇之間則
復觀塵分別之處則復見緣頑虛之中徧是空性鬱
埽之象則紆昏塵澄霽斂氣又觀清淨阿難汝咸看
此諸變化相吾今各還本所因處云何本因阿難此

諸變化明還日輪何以故無日不明明因屬日是故
還日暗還黑月通還戶牖壅還牆宇緣還分別頑虛
還空鬱埽還塵清明還霽則諸世間一切所有不出
斯類汝見八種見精明性當欲誰還何以故若還於
明則不明時無復見暗雖明暗等種種差別見無差
別諸可還者自然非汝不汝還者非汝而誰則知汝
心本妙明淨汝自迷悶喪本受輪於生死中常被漂
溺是故如來名可憐愍阿難言我雖識此見性無還
云何得知是我真性佛告阿難吾今問汝今汝未得
無漏清淨承佛神力見於初禪得無障礙而阿那律

楞嚴經卷二第六葉

見閻浮提如觀掌中菴摩羅果諸菩薩等見百千界
十方如來窮盡微塵清淨國土無所不瞩眾生洞視
不過分寸阿難且吾與汝觀四天王所住宮殿中間
徧覽水陸空行雖有昏明種種形像無非前塵分別
留礙汝應於此分別自他今吾將汝擇於見中誰是
我體誰為物象阿難極汝見源從日月宮是物非汝
至七金山周徧諦觀雜種種光亦物非汝漸漸更觀
雲騰鳥飛風動塵起樹木山川草芥人畜成物非汝
阿難是諸近遠諸有物性雖復差殊同汝見精清淨
所瞩則諸物類自有差別見性無殊此精妙明誠汝

見性若見是物則汝亦可見吾之見若同見者名為
見吾吾不見時何不見吾不見之處若見不見自然
非彼不見之相若不見吾不見之地自然非物云何
非汝又則汝今見物之時汝既見物物亦見汝體性
紛雜則汝與我并諸世間不成安立阿難若汝見時
是汝非我見性周徧非汝而誰云何自疑汝之真性
性汝不真取我求實阿難白佛言世尊若此見性必
我非餘我與如來觀四天王勝藏寶殿居日月宮此
見周圓徧娑婆國退歸精舍祇見伽藍清心戶堂但
瞻簷廡世尊以見如是其體本來周徧一界今在室

楞嚴經卷二第七葉

中唯滿一室為濶此見縮大為小為當牆宇夾令斷
絕我今不知斯義所在願垂引慈為我敷演佛告阿
難一切世間大小內外諸所事業各屬前塵不應說
言見有舒縮譬如方器中見方空吾復問汝此方器
中所見方空為濶定方為不定方若定方者別安圓
器空應不圓若不定者在方器中應無方空汝言不
知斯義所在義性如是云何為在阿難若復欲令入
無方圓但除器方空體無方不應說言更除虛空方
相所在若如汝問入室之時縮見令小仰觀日時汝
豈挽見齊於日面若築牆宇能夾見斷穿為小竇甯

無續迹是義不然一切眾生從無始來迷已為物失
於本心為物所轉故於是中觀大觀小若能轉物則
同如來身心圓明不動道場於一毛端徧能含受十
方國土阿難白佛言世尊若此見精必我妙性今此
妙性現在我前見必我真我今身心復是何物而今
身心分別有實彼見無別分辯我身若實我心令我
今見見性實我而身非我何殊如來先所難言物能
見我唯垂大慈開發未悟佛告阿難今汝所言見在
汝前是義非實若實汝前汝實見者則此見精既有
方所非無指示且今與汝坐祇陀林徧觀林渠及與

楞嚴經卷二第八葉

殿堂上至日月前對恒河汝今於我師子座前舉手
指陳是種種相陰者是林明者是日礙者是譬通者
是空如是乃至草樹纖毫大小雖殊但可有形無不
指著若必其見現在汝前汝應以手確實指陳何者
是見阿難當知若空是見既已成見何者是空若物
是見既已是見何者為物汝可微細披剝萬象析出
精明淨妙見元指陳示我同彼諸物分明無惑阿難
言我今於此重閣講堂遠洎恒河上觀日月舉手所
指縱目所觀指皆是物無是見者世尊如佛所說况
我有漏初學聲聞乃至菩薩亦不能於萬物象前剖

出精見離一切物別有自性佛言如是如是佛復告
阿難如汝所言無有見精離一切物別有自性則汝
所指是物之中無是見者今復告汝汝與如來坐祇
陀林更觀林苑乃至日月種種象殊必無見精受汝
所指汝又發明此諸物中何者非見阿難言我實徧
見此祇陀林不知是中何者非見何以故若樹非見
云何見樹若樹即見復云何樹如是乃至若空非見
云何見空若空即見復云何空我又思維是萬象中
微細發明無非見者佛言如是如是於是大眾非無
學者聞佛此言茫然不知是義終始一時惶悚失其

楞嚴經卷二第九葉

所守如來知其魂慮變惛心生憐愍安慰阿難及諸
大眾諸善男子無上法王是真實語如所說不誑
不妄非末伽黎四種不死矯亂論議汝諦思維無忝
衰慕是時文殊師利法王子愍諸四眾在大眾中即
從座起頂禮佛足合掌恭敬而白佛言世尊此諸大
眾不悟如來發明二種精見色空是非是義世尊若
此前緣色空等象若是見者應有所指若非見者應
無所矚而今不知是義所歸故有驚怖非是疇昔善
根輕鮮唯願如來大慈發明此諸物象與此見精元
是何物於其中間無是非是佛告文殊及諸大眾十

方如來及大菩薩於其自住三摩地中見與見緣并
所想相如虛空華本無所有此見及緣元是菩提妙
淨明體云何於中有是非是文殊吾今問汝如汝文
殊更有文殊是文殊者為無文殊如是世尊我真文
殊無是文殊何以故若有是者則二文殊然我今日
非無文殊於中實無是非二相佛言此見妙明與諸
空塵亦復如是本是妙明無上菩提淨圓真心妄為
色空及與聞見如弟二月誰為是月又誰非月文殊
但一月真中間自無是月非月是以汝今觀見與塵
種種發明名為妄想不能於中出是非是由是真精

楞嚴經卷二第十葉

妙覺明性故能令汝出指非指阿難白佛言世尊誠
如法王所說覺緣徧十方界甚然常住性非生滅與
先梵志娑毗迦羅所談冥諦及枝灰等諸外道種說
有真我徧滿十方有何差別世尊亦曾於楞伽山為
大慧等敷演新義彼外道等常說自然我說因緣非
彼境界我今觀以覺性自然非生非滅遠離一切虛
妄顛倒似非因緣與彼自然云何開示不入羣邪獲
真實心妙覺明性佛告阿難我今如是開示方便真
實告汝汝猶未悟惑為自然阿難若必自然自須甄
明有自然體汝且觀以妙明見中以何為自以見為

復以明為自以暗為自以空為自以塞為自阿難若
明為自應不見暗若復以空為自體者應不見塞如
是乃至諸暗等相以為自者則於明時見性斷滅云
何見明阿難言必此妙見性非自然我今發明是因
緣生心猶未明咨詢如來是義云何合因緣性佛言
汝言因緣吾復問汝汝今因見見性現前此見為復
因明有見因暗有見因空有見因塞有見阿難若因
明有應不見暗如因暗有應不見明如是乃至因空
因塞同於明暗復次阿難此見又復緣明有見緣暗
有見緣空有見緣塞有見阿難若緣空有應不見塞

楞嚴經卷二第十一葉

若緣塞有應不見空如是乃至緣明緣暗同於空塞
當知如是精覺妙明非因非緣亦非自然非不自然
無非不非無是非是離一切相即一切法汝今云何
於中措心以諸世間戲論名相而得分別如以手掌
撮摩虛空祇益自勞虛空云何隨汝執捉阿難白佛
言世尊必妙覺性非因非緣世尊云何常與此亡宣
說見性具四種緣所謂因空因明因心因眼是義云
何佛言阿難我說世間諸因緣相非第一義阿難吾
復問汝諸世間人說我能見云何名見云何不見阿
難言世人因於日月燈光見種種相名之為見若復

無此三種光明則不能見阿難若無明時名不見者
應不見暗若必見暗此但無明云何無見阿難若在
暗時不見明故名為不見今在明時不見暗相還名
不見如是二相俱名不見若復二相自相陵奪非汝
見性於中暫無如是則知二俱名見云何不見是故
阿難汝今當知見明之時見非是明見暗之時見非
是暗見空之時見非是空見塞之時見非是塞四義
成就汝復應知見見之時見非是見見猶離見見不
能及云何復說因緣自然及和合相汝等聲聞狹劣
無識不能通達清淨實相吾今誨汝當善思維無得

楞嚴經卷二第十二葉

疲倦妙菩提路阿難白佛言世尊如佛世尊為我等
輩宣說因緣及與自然諸和合相與不和合心猶未
開而今更聞見見非見重增迷悶伏願弘慈施大慧
目開示我等覺心明淨作是語已悲淚頂禮承受聖
旨爾時世尊憐愍阿難及諸大眾將欲敷演大陀羅
尼諸三摩提妙修行路告阿難言汝雖強記但益多
聞於奢摩他微密觀照心猶未了汝今諦聽吾當為
汝分別開示亦令將來諸有漏者獲菩提果阿難一
切眾生輪迴世間由二顛倒分別見妄當處發生當
業輪轉云何二見一者眾生別業妄見二者眾生同

分妄見云何名為別業妄見阿難如世間人目有赤
眚夜見燈光別有圓影五色重疊於意云何以夜燈
明所現圓光為是燈色為當見色阿難此若燈色則
非眚人何不同見而此圓影唯眚之觀若是見色見
已成色則彼眚人見圓影者名為何等復次阿難若
此圓影離燈別有則合傍觀屏帳几筵有圓影出離
見別有應非眼眚云何眚人目見圓影是故當知色
實在燈見病為影影見俱眚見眚非病終不應言是
燈是見於是中有非燈非見如弟二月非體非影何
以故弟二之觀捏所成故諸有智者不應說言此捏

楞嚴經卷二弟十三葉

根元是形非形離見非見此亦如是目眚所成今欲
名誰是燈是見何況分別非燈非見云何名為同分
妄見阿難以閻浮提除大海水中間平陸有三千洲
心中大洲東西括量大國凡有二千三百其餘小洲
在諸海中其間或有三兩百國或一或二至於三十
四十五十阿難若復此中有一小洲祇有兩國唯一
國人同感惡緣則彼小洲當主眾生觀諸一切不祥
境界或見二日或見兩月其中乃至暈適珮玦彗孛
飛流負耳虹蜺種種惡相但此國見彼國眾生本所
不見亦復不聞阿難吾今為汝以此二事進退合明

阿難如彼眾生別業妄見。曠燈光中所現圓影。雖似前境。終彼見者目眚。所成眚即見勞。非色所造。然見眚者終無見咎。例汝今日以目觀見山河國土及諸眾生。皆是無始見病。所成見與見緣。似現前境。元我覺明。見所緣眚。覺見即眚。本覺明心。覺緣非眚。覺所覺眚。覺非眚中。此實見見云何。復名覺聞知見是故。汝今見我及汝并諸世間十類眾生。皆即見眚。非見眚者。彼見真精性。非眚者。故不名見。阿難如彼眾生同分妄見。例彼妄見別業一人一病。目人同彼一國。彼見圓影眚妄。所生此眾同分。所現不祥。同見業中。

瘴惡所起。俱是無始見妄。所生例閻浮提三千洲中。兼四大海娑婆世界。并洎十方諸有漏國。及諸眾生。同是覺明無漏妙心。見聞覺知。虛妄病緣。和合妄生。和合妄死。若能遠離諸和合緣。及不和合。則復滅除諸生死。因圓滿菩提。不生滅性。清淨本心。本覺常住。阿難。汝雖先悟本覺妙明性。非因緣。非自然性。而猶未明。如是覺元非和合生。及不和合。阿難。吾今復以前塵問汝。汝今猶以一切世間妄想和合諸因緣性。而自疑惑。證菩提心和合起者。則汝今者。妙淨見精。為與明和。為與暗和。為與通和。為與塞和。若明和者。

且汝觀明當明現前何處雜見見相可辨雜何形像
若非見者云何見明若即見者云何見見必見圓滿
何處和明若明圓滿不合見和見必異明雜則失彼
性明名字雜失明性和明非義彼暗與通及諸羣塞
亦復如是復次阿難又汝今者妙淨見精為與明合
為與暗合為與通合為與塞合若明合者至於暗時
明相已滅此見即不與諸暗合云何見暗若見暗時
不與暗合與明合者應非見明既不見明云何明合
了明非暗彼暗與通及諸羣塞亦復如是阿難白佛
言世尊如我思維此妙覺元與諸緣塵及心念慮非

和合耶佛言汝今又言覺非和合吾復問汝此妙見
精非和合者為非明和為非暗和為非通和為非塞
和若非明和則見與明必有邊畔汝且諦觀何處是
明何處是見在見在明自何為畔阿難若明際中必
無見者則不相及自不知其明相所在畔云何成彼
暗與通及諸羣塞亦復如是又妙見精非和合者為
非明合為非暗合為非通合為非塞合若非明合則
見與明性相乖角如耳與明了不相觸見且不知明
相所在云何甄明合非合理彼暗與通及諸羣塞亦
復如是阿難汝猶未明一切浮塵諸幻化相當處出

生隨處滅盡幻妄稱相其性真為妙覺明體如是乃至五陰六入從十二處至十八界因緣和合虛妄有生因緣別離虛妄名滅殊不能知生滅去來本如來藏常住妙明不動周圓妙真如性性真常中求於去來迷悟生死了無所得阿難云何五陰本如來藏妙真如性阿難辟如有人以清淨目觀精明空唯一晴虛迴無所有其人無故不動目睛瞪以疲勞則於虛空別見狂華復有一切狂亂非相色陰當知亦復如是阿難是諸狂華非從空來非從目出如是阿難若空來者既從空來還從空入若有出入即非虛空空


若非空自不容其華相起滅如阿難體不容阿難若目出者既從目出還從目入即此華性從目出故當合有見若有見者去既華空旋合見眼若無見者出既翳空旋當翳眼又見華時目應無翳云何晴空號清明眼是故當知色陰虛妄本非因緣非自然性阿難辟如有人手足宴安百骸調適忽如忘生性無違順其人無故以二手掌於空相摩於二手中妄生澀滑冷熱諸相受陰當知亦復如是阿難是諸幻觸不從空來不從掌出如是阿難若空來者既能觸掌何不觸身不應虛空選擇來觸若從掌出應非待合又

掌出故合則掌知離則觸入臂腕骨髓應亦覺知入
時蹤跡必有覺心知出知入自有一物身中往來何
待合知要名為觸是故當知受陰虛妄本非因緣非
自然性阿難譬如有人談說酢梅口中水出思蹋懸
崖足心酸澀想陰當知亦復如是阿難如是酢說不
從梅生非從口入如是阿難若梅生者梅合自談何
待人說若從口入自合口聞何須待耳若獨耳聞此
水何不耳中而出想蹋懸崖與說相類是故當知想
陰虛妄本非因緣非自然性阿難譬如暴流波浪相
續前際後際不相踰越行陰當知亦復如是阿難如

是流性不因空生不因水有亦非水性非離空水如
是阿難若因空生則十方無盡虛空成無盡流世
界自然俱受淪溺若因水有則此暴流性應非水有
所有相今應現在若即水性則澄清時應非水體若
離空水空非有外水外無流是故當知行陰虛妄本
非因緣非自然性阿難譬如有人取頻伽餅塞其兩
孔滿中擊空千里遠行用餉他國識陰當知亦復如
是阿難如是虛空非彼方來非此方入如是阿難若
彼方來則本餅中既貯空去於本餅地應少虛空若
此方入開孔倒餅應見空出是故當知識陰虛妄本

非因緣非自然性

大佛頂如來密因修證了義諸菩薩萬行首楞嚴經
卷第二



楞嚴經卷三第一葉

大佛頂如來密因修證了義諸菩薩萬行首楞嚴經
卷第三

唐天竺沙門般剌密帝譯

烏菴國沙門彌伽擇迦譯語

菩薩戒弟子前正議大夫同中書門下平章

事清河居士筆受

清桐城女子吳芝瑛寫本

復次阿難云何六入本如來藏妙真如性阿難即彼
目睛瞪發勞者兼目與勞同是菩提瞪發勞相因於
明暗二種妄塵發見居中吸此塵象名為見性此見

離彼明暗二塵畢竟無體如是阿難當知是見非明
暗來非於根出不於空生何以故若從明來暗即隨
滅應非見暗若從暗來明即隨滅應無見明若從根
生必無明暗如是見精本無自性若於空出前瞞塵
象歸當見根又空自觀何關汝入是故當知眼入虛
妄本非因緣非自然性阿難辟如有人以兩手指急
塞其耳耳根勞故頭中作聲兼耳與勞同是菩提瞪
發勞相因於動靜二種妄塵散聞居中吸此塵象名
聽聞性以聞離彼動靜二塵畢竟無體如是阿難當
知是聞非動靜來非於根出不於空生何以故若從

楞嚴經卷三第二葉

靜來動即隨滅應非聞動若從動來靜即隨滅應無
覺靜若從根生必無動靜如是聞體本無自性若於
空出有聞成性即非虛空又空自聞何關汝入是故
當知耳入虛妄本非因緣非自然性阿難辟如有人
急畜其鼻畜久成勞則於鼻中聞有冷觸因觸分別
通塞虛實如是乃至諸香臭氣兼鼻與勞同是菩提
瞪發勞相因於通塞二種妄塵散聞居中吸此塵象
名聽聞性以聞離彼通塞二塵畢竟無體當知是聞
非通塞來非於根出不於空生何以故若從通來塞
則聞滅云何知塞如因塞有通則無聞云何發明香

臭等觸若從根生必無通塞如是聞機本無自性若
從空出是聞自當迴歟汝鼻空自有聞何關汝入是
故當知鼻入虛妄本非因緣非自然性阿難辟如有
人以舌舐吻熟舐令勞其人若病則有苦味無病之
人微有甜觸由甜與苦顯此舌根不動之時淡性常
在兼舌與勞同是菩提瞪發勞相因甜苦淡二種妄
塵發知居中吸此塵象名知味性此知味性離彼甜
苦及淡二塵畢竟無體如是阿難當知如是嘗苦淡
知非甜苦未非因淡有又非根出不於空生何以故
若甜苦未淡則知滅云何知淡若從淡出甜即知亡

楞嚴經卷三第三葉

復云何知甜苦二相若從舌生必無甜淡及與苦塵
斯知味根本無自性若於空出虛空自味非汝口知
又空自如何關汝入是故當知舌入虛妄本非因緣
非自然性阿難辟如有人以一冷手觸於熱手若冷
勢多熱者從冷若熱功勝冷者成熱如是以此合覺
之觸顯於離知涉勢若成因於勞觸兼身與勞同是
菩提瞪發勞相因於離合二種妄塵發覺居中吸此
塵象名知覺性此知覺體離彼離合違順二塵畢竟
無體如是阿難當知是覺非離合未非違順有不於
根出又非空生何以故若合時來離當已滅云何覺

離違順二相亦復如是若從根出必無離合違順四相則汝身知元無自性必於空出空自知覺何關汝入是故當知身入虛妄本非因緣非自然性阿難辟如有人勞倦則眠睡熟便寤覺塵斯憶失憶為忘是其顛倒生住異滅吸習中歸不相踰越稱意知根兼意與勞同是菩提瞪發勞相因於生滅二種妄塵集知居中及撮內塵見聞流流不及地名覺知性以覺知性離彼寤寐生滅二塵畢竟無體如是阿難當知如是覺知之根非寤寐來非生滅有不於根出亦非空生何以故若從寤寐來即隨滅將何為寐必生

楞嚴經卷三第四葉

時有滅即同無令誰受滅若從滅有生即滅無誰知生者若從根出寤寐二相隨身開合離斯二體以覺知者同於空華畢竟無性若從空生自是空知何關汝入是故當知意入虛妄本非因緣非自然性復次阿難云何十二處本如來藏妙真如性阿難汝且觀此祇陀樹林及諸泉池於意云何此等為是色生眼見眼生色相阿難若復眼根生色相者見空非色色性應銷銷則顯發一切都無色相既無誰明空質空亦如是若復色塵生眼見者觀空非色見即銷亡亡則都無誰明空色是故當知見與色空俱無處所即

鉢其間或過酥酪醍醐名為上味於意云何此味為
復生於空中生於舌中為生食中阿難若復此味生
於汝舌在汝口中祇有一舌其舌爾時已成酥味遇
黑石蜜應不推移若不變移不名知味若變移者舌
非多體云何多味一舌之知若生於食食非有識云
何自知又食自知即同他食何預於汝名味之知若
生於空汝噉虛空當作何味必其虛空若作鹹味既
鹹汝舌亦鹹汝面則此界人同於海魚既常受鹹了
不知淡若不識淡亦不覺鹹必無所知云何名味是
故當知味舌與嘗俱無處所即嘗與味二俱虛妄本

楞嚴經卷三第五葉

處虛妄本非因緣非自然性阿難汝又覷此鑪中栴
檀此香若復然於一鉢室羅筏城四十里內同時聞
氣於意云何以香為復生栴檀木生於汝鼻為生於
空阿難若復此香生於汝鼻稱鼻所生當從鼻出鼻
非栴檀云何鼻中有栴檀氣稱汝聞香當於鼻入鼻
中出香說聞非義若生於空空性常恒香應常在何
藉鑪中爇此枯木若生於木則此香質因爇成烟若
鼻得聞合蒙烟氣其烟騰空未及遙遠四十里內云
何已聞是故當知香鼻與聞俱無處所即覷與香二
處虛妄本非因緣非自然性阿難汝常二時眾中持

色與見二處虛妄本非因緣非自然性阿難汝更聽
此祇陀園中食辦擊鼓眾集撞鐘鐘鼓音聲前後相
續於意云何以等為是聲來耳邊耳往聲處阿難若
復以聲來於耳邊如我乞食室羅筏城在祇陀林則
無有我此聲必來阿難耳處目連迦葉應不俱聞何
况其中一千二百五十沙門一聞鐘聲同來食處若
復汝耳往彼聲邊如我歸往祇陀林中在室羅城則
無有我汝聞鼓聲其耳已往擊鼓之處鐘聲齊出應
不俱聞何況其中象馬牛羊種種音響若無來往亦
復無聞是故當知聽與音聲俱無處所即聽與聲二

楞嚴經卷三第六葉

非因緣非自然性阿難汝常晨朝以手摩頭於意云
何以摩所知誰為能觸能為在手為復在頭若在於
手頭則無知云何成觸若在於頭手則無用云何名
觸若各各有則汝阿難應有二身若頭與手一觸所
生則手與頭當為一體若一體者觸則無成若二體
者觸誰為在在能非所在所非能不應虛空與汝成
觸是故當知覺觸與身俱無處所即身與觸二俱虛
妄本非因緣非自然性阿難汝常意中所緣善惡無
記三性生成法則此法為復即心所生為當離心別
有方所阿難若即心者法則非塵非心所緣云何成

處若離於心別有方所則法自性為知非知知則名
心異汝非塵同他心量即汝即心云何汝心更二於
汝若非知者此塵既非色聲香味離合冷煖及虛空
相當於何在於色空都無表示不應人聞更有空
外心非所緣處從誰立是故當知法則與心俱無處
所則意與法二俱虛妄本非因緣非自然性復次阿
難云何十八界本如來藏妙真如性阿難如汝所明
眼色為緣生於眼識此識為復因眼所生以眼為界
因色所生以色為界阿難若因眼生既無色空無可
分別縱有汝識欲將何用汝見又非青黃赤白無所

楞嚴經卷三第七葉

表示從何立界若因色生空無色時汝識應滅云何
識知是虛空性若色變時汝亦識其色相遷變汝識
不遷界從何立從變則變界相自無不變則恒既從
色生應不識知虛空所在若兼二種眼色共生合則
中離離則兩合體性雜亂云何成界是故當知眼色
為緣生眼識界三處都無則眼與色及色界三本非
因緣非自然性阿難又汝所明耳聲為緣生於耳識
此識為復因耳所生以耳為界因聲所生以聲為界
阿難若因耳生動靜二相既不現前根不成知必無
所知尚無成識何形貌若取耳聞無動靜故聞無

所成云何耳形雜色觸塵名為識界則耳識界復從誰立若生於聲識因聲有則不闕聞無聞則亡聲相所在識從聲生許聲因聞而有聲相聞應聞識不聞非界聞則同聲識已被聞誰知聞識若無知者終如草木不應聲聞雜成中境界無中位則內外相復從何成是故當知耳聲為緣生耳識界三處都無則耳與聲及聲界三本非因緣非自然性阿難又汝所明鼻香為緣生於鼻識以識為復因鼻所生以鼻為界因香所生以香為界阿難若因鼻生則汝心中以何為鼻為取肉形雙爪之相為取麤知動搖之性若取

肉形肉質乃身身知即觸名身非鼻名觸即塵鼻尚無名云何立界若取麤知又汝心中以何為知以肉為知則肉之知元觸非鼻以空為知空則自知肉應非覺如是則應虛空是汝汝身非知今日阿難應無所在以香為知知自屬香何預於汝若香臭氣必生汝鼻則彼香臭二種流氣不生伊蘭及栴檀木二物不來汝自麤鼻為香為臭臭則非香香應非臭若香臭二俱能聞者則汝一人應有兩鼻對我問道有二阿難誰為汝體若鼻是一香臭無二臭既為香香復成臭二性不有界從誰立若因香生識因香有如眼

有見不能觀眼因香有故應不知香知即非生不知
非識香非知有香界不成識不知香因界則非從香
建立既無中間不成內外彼諸聞性畢竟虛妄是故
當知鼻香為緣生鼻識界三處都無則鼻與香及香
界三本非因緣非自然性阿難又汝所明舌味為緣
生於舌識此識為復因舌所生以舌為界因味所生
以味為界阿難若因舌生則諸世間甘蔗烏梅黃連
石鹽細辛薑桂都無有味汝自嘗舌為甜為苦若舌
性苦誰來嘗舌舌不自嘗孰為知覺舌性非苦味自
不生云何立界若因味生識自為味同於舌根應不

楞嚴經卷三第九葉

自嘗云何識知是味非味又一切味非一物生味既
多生識應多體識體若一體必味生鹹淡甘辛和合
俱生諸變異相同為一味應無分別分別既無則不
名識云何復名舌味識界不應虛空生汝心識舌味
和合即於是中元無自性云何界生是故當知舌味
為緣生舌識界三處都無則舌與味及舌界三本非
因緣非自然性阿難又汝所明身觸為緣生於身識
此識為復因身所生以身為界因觸所生以觸為界
阿難若因身生必無合離二覺觀緣身何所識若因
觸生必無汝身誰有非身知合離者阿難物不觸知

身知有觸知身即觸知觸即身即觸非身即身非觸
身觸二相元無處所合身即為身自體性離身即是
虛空等相內外不成中云何立中不復立內外性空
則汝識生從誰立界是故當知身觸為緣生身識界
三處都無則身與觸及身界三本非因緣非自然性
阿難又汝所明意法為緣生於意識此識為復因意
所生以意為界因法所生以法為界阿難若因意生
於汝意中必有所思發明汝意若無前法意無所生
離緣無形識將何用又汝識心與諸思量兼了別性
為同為異同意即意云何所生異意不同應無所識

若無所識云何意生若有所識云何識意唯同與異
二性無成界云何立若因法生世間諸法不離五塵
汝觀色法及諸聲法香法味法及與觸法相狀分明
以對五根非意所攝汝識決定依於法生今汝諦觀
法法何狀若離色空動靜通塞合離生滅越此諸相
終無所得生則色空諸法等生滅則色空諸法等滅
所因既無因生有識作何形相相狀不有界云何生
是故當知意法為緣生意識界三處都無則意與法
及意界三本非因緣非自然性阿難白佛言世尊如
來常說和合因緣一切世間種種變化皆因四大和

合發明云何如來因緣自然二俱排擯我今不知斯
義所屬唯垂哀愍開示眾生中道了義無戲論法爾
時世尊告阿難言汝先厭離聲聞緣覺諸小乘法發
心勤求無上菩提故我今時為汝開示第一義諦如
何復將世間戲論妄想因緣而自纏繞汝雖多聞如
說藥人真藥現前不能分別如來說為真可憐愍汝
今諦聽吾當為汝分別開示亦令當來修大樂者通
達實相阿難默然承佛聖旨阿難如汝所言四大和
合發明世間種種變化阿難若彼大性體非和合則
不能與諸大雜和猶如虛空不和諸色若和合者同

楞嚴經卷三第十一葉

於變化始終相成生滅相續生死生生死死如
旋火輪未有休息阿難如水成冰冰還成水汝觀地
性粗為大地細為微塵至鄰虛塵析彼極微色邊際
相七分所成更析鄰虛即實空性阿難若此鄰虛析
成虛空當知虛空出生色相汝今問言由和合故出
生世間諸變化相汝且觀此一鄰虛塵用幾虛空和
合而有不應鄰虛合成鄰虛又鄰虛塵析入空者用
幾色相合成虛空若色合時合色非空若空合時合
空非色色猶可析空云何合汝元不知如來藏中性
色真空性空真色清淨本然周徧法界隨眾生心應

所知量循業發現世間無知惑為因緣及自然性皆是識心分別計度但有言說都無實義阿難火性無我寄於諸緣汝觀城中未食之家欲炊爨時手執陽燧日前求火阿難名和合者如我與汝一千二百五十比丘今為一眾眾雖為一詰其根本各各有身皆有所生氏族名字如舍利弗婆羅門種優樓頻螺迦葉波種乃至阿難瞿曇種姓阿難若此火性因和合有彼手執鏡於日求火此火為從鏡中而出為從艾出為於日來阿難若日來者自能燒汝手中之艾來處林木皆應受焚若鏡中出自能於鏡出然於艾鏡

楞嚴經卷三第十二葉

何不鎔紆汝手執尚無熱相云何融泮若生於艾何藉日鏡光明相接然後火生汝又諦觀鏡因手執日從天來艾本地生火從何方游歷於此日鏡相遠非和非合不應火光無從自有汝猶不知如來藏中性火真空性空真火清淨本然周徧法界隨眾生心應所知量阿難當知世人一處執鏡一處火生徧法界執滿世間起徧世間甯有方所知業發現世間無知惑為因緣及自然性皆是識心分別計度但有言說都無實義阿難水性不定流息無恒如室羅城迦毗羅僂所迦羅僂及鉢頭摩訶薩多等諸大幻師求

大陰精用和幻藥是諸師等於白月晝手執方諸承
月中水以水為復從珠中出空中自有為從月來阿
難若從月來尚能遠方令珠出水所經林木皆應吐
流流則何待方諸所出不流明水非從月降若從珠
出則以珠中常應流水何待中宵承白月晝若從空
生空性無邊水當無際從人消天皆同溘溺云何復
有水陸空行汝更諦觀月從天陟珠因手持承珠水
槃本人敷設水從何方流注於此月珠相遠非和非
合不應水精無從自有汝尚不知如來藏中性水真
空性空真水清淨本然周徧法界隨眾生心應所知

楞嚴經卷三第十三葉

量一處執珠一處水出徧法界執滿法界生生滿世
間甯有方所循業發現世間無知惑為因緣及自然
性皆是識心分別計度但有言說都無實義阿難風
性無體動靜不常汝常整衣入於大眾僧伽梨角動
及傷人則有微風拂彼人面此風為復出袈裟角散
於虛空生彼人面阿難此風若復出袈裟角汝乃披
風其衣飛搖應離汝體我今說法會中垂衣汝看我
衣風何所在不應衣中有藏風地若生虛空汝衣不
動何因無拂空性常住風應常生若無風時虛空當
滅滅風可見滅空何狀若有生滅不名虛空名為虛

空云何風出若風自生被拂之面從彼面生當應拂
汝自汝整衣云何倒拂汝審諦觀整衣在汝面屬彼
人虛空寂然不參流動風自誰方鼓動來此風空性
障非和非合不應風性無從自有汝宛不知如來藏
中性風真空性空真風清淨本然周徧法界隨眾生
心應所知量阿難如汝一人微動服衣有微風出徧
法界拂滿國土生周徧世間甯有方所循業發現世
間無知惑為因緣及自然性皆是識心分別計度但
有言說都無實義阿難空性無形因色顯發如室羅
城去河遙處諸刹利種及婆羅門毗舍首陀兼頗羅

墮梅陀羅等新立安居鑿井求水出土一尺於中則
有一尺虛空如是乃至出土一丈中間還得一丈虛
空虛空淺深隨出多少此空為當因土所出因鑿所
有無因自生阿難若復以此空無因自生未鑿土前何
不無礙唯見大地迥無通達若因土出則土出時應
見空入若土先出無空入者云何虛空因土而出若
無出入則應空土元無異因無異則同則土出時空
何不出若因鑿出則鑿出空應非出土不因鑿出鑿
自出土云何見空汝更審諦審諦觀鑿後人手隨
方運轉土因地移如是虛空因何所出鑿空虛實不

相為用非和非合不應虛空無從自出若此虛空性
圓周徧本不動搖當知現前地水火風均名五大性
真圓融皆如來藏本無生滅阿難汝心昏迷不悟四
大元如來藏當觀虛空為出為入為非出入汝全不
知如來藏中性覺真空性空真覺清淨本然周徧法
界隨眾生心應所知量阿難如一井空空生一井十
方虛空亦復如是圓滿十方甯有方所循業發現世
間無知惑為因緣及自然性皆是識心分別計度但
有言說都無實義阿難見覺無知因色空有如汝今
者在祇陀林朝明夕昏設居中宵白月則光黑月便

暗則明暗等因見分析此見為復與明暗相并太虛
空為同一體為非一體或同非同或異非異阿難此
見若復與明與暗及與虛空元一體者則明與暗二
體相亡暗時無明明時無暗若與暗一明則見亡必
一於明暗時當滅滅則云何見明見暗若明暗殊見
無生滅一云何成若此見精與暗與明非一體者汝
離明暗及與虛空分析見元作何形相離明離暗及
離虛空是見元同龜毛兔角明暗虛空三事俱異後
何立見明暗相背云何或同離三元無云何或異分
空分見本無邊畔云何非同見暗見明性非遷改云

何非異汝更細審微細審詳審諦審觀明後太陽暗
隨黑月通屬虛空壅歸大地如是見精因何所出見
覺空頑非和非合不應見精無從自出若見聞知性
圓周徧本不動搖當知無邊不動虛空并其動搖地
水火風均名六大性真圓融皆如來藏本無生滅阿
難汝性沈淪不悟汝之見聞覺知本如來藏汝當觀
此見聞覺知為生為滅為同為異為非生滅為非同
異汝曾不知如來藏中性見覺明覺精明見清淨本
然周徧法界隨眾生心應所知量如一見根見周法
界聽聽嘗觸覺觸覺知妙德瑩然徧周法界圓滿十

虛甯有方所循業散現世間無知惑為因緣及自然
性皆是識心分別計度但有言說都無實義阿難識
性無源因於六種根塵妄出汝今徧觀以會聖眾用
目循歷其目周視但如鏡中無別分析汝識於中次
弟標指此是文殊以富樓那以目捷連以須菩提以
舍利弗以識了知為生於見為生於相為生虛空為
無所因突然而出阿難若汝識性生於見中如無明
暗及與色空四種必無元無汝見見性尚無從何發
識若汝識性生於相中不從見生既不見明亦不見
暗明暗不矚即無色空彼相尚無識從何發若生於

空非相非見非見無辨自不能知明暗色空非相滅
緣見聞覺知無處安立處此二非空則同無有非同
物縱發汝識欲何分別若無所因突然而出何不日
中別識明月汝更細詳微細詳審見託汝晴相推前
境可狀成有不相成無如是識緣因何所出識動見
澄非和非合聞聽覺知亦復如是不應識緣無從自
出若此識心本無所從當知了別見聞覺知圓滿湛
然性非從所兼彼虛空地水火風均名七大性真圓
融皆如來藏本無生滅阿難汝心粗浮不悟見聞發
明了知本如來藏汝應觀此六處識心為同為異為

楞嚴經卷三第十七葉

空為有為非同異為非空有汝元不知如來藏中性
識明知覺明真識妙覺湛然徧周法界含吐十虛甯
有方所循業發現世間無知惑為因緣及自然性皆
是識心分別計度但有言說都無實義爾時阿難及
諸大眾蒙佛如來微妙開示身心蕩然得無罣礙是
諸大眾各各知心徧十方見十方空如觀手中所
持葉物一切世間諸所有物皆即菩提妙明元心心
精徧圓含裹十方及觀父母所生之身猶徧十方虛
空之中吹一微塵若存若亡如湛巨海流一浮漚起
滅無從了然自知獲本妙心常住不滅禮佛合掌得

未曾有於如來前說偈讚佛

妙湛總持不動尊
銷我億劫顛倒想
願今得果成寶王
將此深心奉塵刹
伏請世尊為證明
如一眾生未成佛
大雄大力大慈悲
令我早登無上覺
舜若多性可銷亡

首楞嚴王世希有
不歷僧祇獲法身
還度如是恒沙眾
是則名為報佛恩
五濁惡世誓先入
終不於此取泥洹
希更審除微細惑
於十方界坐道場
樂迦羅心無動轉

楞嚴經卷三第十八葉

大佛頂如來密因修證了義諸菩薩萬行首楞嚴經
卷第三

大佛頂如來密因修證了義諸菩薩萬行首楞嚴經
卷第四

楞嚴經卷四第一葉

唐天竺沙門般刺密帝譯

烏菴國沙門彌伽釋迦譯語

菩薩戒弟子前正議大夫同中書門下平章

事清河房融筆受

清桐城女子吳芝瑛寫本

爾時富樓那彌多羅尼子在大眾中即從座起偏袒
右肩右卻著地合掌恭敬而白佛言大威德世尊善
為眾生敷演如來第一義諦世尊常推說法人中我

為第一今聞如來微妙法音猶如聾人逾百步外聆
於蚊蚋本所不見何況得聞佛雖宣明令我除惑今
猶未詳斯義究竟無疑惑地世尊如阿難輩雖則開
悟習漏未除我等會中登無漏者雖盡諸漏今聞如
來所說法音尚紆疑悔世尊若復世間一切根塵陰
處界等皆如來藏清淨本然云何忽生山河大地諸
有為相次第遞流終而復始又如來說地水火風本
性圓融周徧法界湛然常住世尊若地性徧云何容
水水性周徧火則不生復云何明水火二性俱徧虛
空不相凌滅世尊地性障礙空性虛通云何一但周

楞嚴經卷四第二葉

徧法界而我不知是義攸往唯願如來宣流大慈開
我迷雲及諸大眾作是語已五體投地欽渴如來無
上慈誨爾時世尊告富樓那及諸會中漏盡無學諸
阿羅漢如來今日普為此會宣勝義中真勝義性令
汝會中定性聲聞及諸一切未得二空迴向上乘阿
羅漢等皆獲一乘寂滅場地真阿練若正修行處汝
今諦聽當為汝說富樓那等欽佛法音默然承聽佛
言富樓那如汝所言清淨本然云何忽生山河大地
汝常不聞如來宣說性覺妙明本覺明妙富樓那言
唯然世尊我常聞佛宣說斯義佛言汝稱覺明為復

性明稱名為覺為覺不明稱為明覺富樓那言若以不明名為覺者則無所明佛言若無所明則無明覺有所非覺無所非明無明又非覺湛明性性覺必明妄為明覺覺非所明因明立所所既妄立生汝妄能無同異中熾然成異異彼所異因異立同同異散明因以復立無同無異如是擾亂相待生勞勞久散塵自相渾濁由是引起塵勞煩惱起為世界靜成虛空虛空為同世界為異彼無同異真有為法覺明空昧相待成搖故有風輪執持世界因空生搖堅明立礙彼金寶者明覺立堅故有金輪保持國土堅覺寶成

楞嚴經卷四第三葉

搖明風出風金相摩故有火光為變化性寶明生潤火光上蒸故有水輪含十方界火騰水降交散立堅濕為巨海乾為洲渚以是義故彼大海中火光常起彼洲渚中江河常注水勢劣火結為高山是故山石擊則成燄融則成水土勢劣水抽為草木是故林藪遇燒成土因絞成水交妄發生遞相為種以是因緣世界相續復次富樓那明妄非他覺明為咎所妄既立明理不踰以是因緣聽不出聲見不超色色香味觸六妄成就由是分開見覺聞知同業相纏合離成化見明色散明見想成異見成憎同想成愛流愛為

種納想為胎交造殺生吸引同業故有因緣生羯羅
藍遏蒲曇等胎卵濕化隨其所應卵唯想生胎因情
有濕以合感化以離應情想合離更相變易所有受
業逐其飛沈以是因緣眾生相續富樓那想愛同結
愛不能離則諸世間父母子孫相生不斷是等則以
欲貪為本貪愛同滋貪不能止則諸世間卵化溼胎
隨力強弱遞相吞食是等則以殺貪為本以人食羊
羊死為人人死為羊如是乃至十生之類死死生生
互來相噉惡業俱生窮未來際是等則以盜貪為本
汝負我命我還汝債以是因緣經百千劫常在生死

楞嚴經卷四第四葉

汝愛我心我憐汝色以是因緣經百千劫常在纏縛
唯殺盜婬三為根本以是因緣業果相續富樓那如
是三種顛倒相續皆是覺明明了知性因了教相從
妄見生山河大地諸有為相次第遞流因此虛妄終
而復始富樓那言若此妙覺本妙覺明與如來心不
增不減無狀忽生山河大地諸有為相如來今得妙
空明覺山河大地有為習漏何當復生佛告富樓那
譬如迷人於一聚落惑南為北此迷為復因迷而有
因悟所出富樓那言如是迷人亦不因迷又不因悟
何以故迷本無根云何因迷悟非生迷云何因悟佛

言彼之迷人正在迷時候有悟人指示令悟富樓那
於意云何此人縱迷於此聚落更生迷不不也世尊
富樓那十方如來亦復如是此迷無本性畢竟空昔
本無迷似有迷覺覺迷滅覺不生迷亦如翳人見
空中華翳病若除華於空滅忽有愚人於彼空華所
滅空地待華更生汝觀是人為愚為慧富樓那言空
元無華妄見生滅見華滅空已是顛倒勅令更出斯
實狂癡云何更名如是狂人為愚為慧佛言如汝所
解云何問言諸佛如來妙覺明空何當更出山河大
地又如金礦雜於精金其金一純更不成雜如未成

楞嚴經卷四第五葉

灰不重為木諸佛如來菩提涅槃亦復如是富樓那
又汝問言地水火風本性圓融周徧法界疑水火性
不相陵滅又徵虛空及諸大地俱徧法界不合相容
富樓那譬如虛空體非羣相而不拒彼諸相發揮所
以者何富樓那彼太虛空日照則明雲屯則暗風搖
則動霧澄則清氣凝則濁土積成霾水澄成映於意
云何如是殊方諸有為相為因彼生為復空有若彼
所生富樓那且日照時既是日明十方世界同為日
色云何空中更見圓日若是空明空應自照云何中
宵雲霧之時不生光曜當知是明非日非空不異空

日觀相元妄無可指陳猶邀空華結為空果云何詰
其相陵滅義觀性元真唯妙覺明妙覺明心先非水
火云何復問不相容者真妙覺明亦復如是汝以空
明則有空現地水火風各各發明則各各現若俱發
明則有俱現云何俱現富樓那如一水中現於日影
兩人同觀水中之日東西各行則各有日隨二人去
一東一西先無準的不應難言此日是一云何各行
各日既雙云何現一宛轉虛妄無可憑據富樓那汝
以色空相傾相奪於如來藏而如來藏隨為色空周
徧法界是故於中風動空澄日明雲暗眾生迷悶背

楞嚴經卷四第六葉

覺合塵故發塵勞有世間相我以妙明不滅不生合
如來藏而如來藏唯妙覺明圓照法界是故於中一
為無量無量為一小中現大大中現小不動道場徧
十方界身含十方無盡虛空於一毛端現寶王刹坐
微塵裏轉大法輪滅塵合覺故發真如妙覺明性而
如來藏本妙圓心非心非空非地非水非風非火非
眼非耳鼻舌身意非色非聲香味觸法非眼識界如
是乃至非意識界非明無明明無明盡如是乃至非
老非死非老死盡非苦非集非滅非道非智非得非
檀那非尸羅非毗梨耶非羣提非禪那非般若刺若非

波羅密多如是乃至非但闍阿竭非阿羅訶三耶三
菩非大涅槃非常非樂非我非淨以是俱非世出世
故即如來藏元明心妙即心即空即地即水即風即
大即眼即耳鼻舌身意即色即聲香味觸法即眼識
界如是乃至即意識界即明無明明無明盡如是乃
至即老即死即老死盡即苦即集即滅即道即智即
得即檀那即尸羅即毗梨耶即羸提即禪那即般刺
若即波羅密多如是乃至即但闍阿竭即阿羅訶三
耶三菩即大涅槃即常即樂即我即淨以是俱即世
出事故即如來藏妙明心元離即離非是即非即如

楞嚴經卷四第七葉

何世間三有眾生及出世間聲聞緣覺以所知心測
度如來無上菩提用世語言入佛知見譬如琴瑟笙
篪琵琶雖有妙音若無妙指終不能發汝與眾生亦
復如是寶覺真心各各圓滿如我按指海印發光汝
暫舉心塵勞先起由不勤求無上覺道愛念小乘得
少為足富樓那言我與如來寶覺圓明真妙淨心無
二圓滿而我昔遭無始妄想久在輪迴今得聖乘猶
未究竟世尊諸妄一切圓滅獨妙真常敢問如來一
切眾生何因有妄自蔽妙明受此淪溺佛告富樓那
汝雖除疑餘惑未盡吾以世間現前諸事今復問汝

汝豈不聞室羅城中演若達多忽於晨朝以鏡照面
愛鏡中頭面目可見瞋責己頭不見面目以為魑魅
無狀狂走於意云何以人何因無故狂走富樓那言
是人心狂更無他故佛言妙覺明圓本圓明妙既稱
為妄云何有因若有所因云何名妄自諸妄想展轉
相因從迷積迷以歷塵劫雖佛叢明猶不能返如是
迷因因迷自有識迷無因妄無所依尚無有生欲何
為滅得菩提者如寤時人說夢中事心縱精明欲何
因緣取夢中物况復無因本無所有如彼城中演若
達多豈有因緣自佈頭走忽然狂歇頭非外得縱未

歇狂亦何遺失富樓那妄性如是因何為在汝但不
隨分別世間業果眾生三種相續三緣斷故三因不
生則汝心中演若達多狂性自歇歇即菩提勝淨明
心本周法界不從人得何藉劬勞肯綮修證辟如有
人於自衣中繫如意珠不自覺知窮露他方乞食馳
走雖實貧窮珠不曾失忽有智者指示其珠所願從
心致大饒富方悟神珠非從外得即時阿難在大眾
中頂禮佛足起立白佛世尊現說殺盜淫業三緣斷
故三因不生心中達多狂性自歇歇即菩提不從人
得斯則因緣皎然明白云何如來頓弃因緣我從因

緣心得開悟世尊以義何獨我等年少有學聲聞今
此會中大目犍連及舍利弗須菩提等後老梵志聞
佛因緣發心開悟得成無漏今說菩提不從因緣則
王舍城拘舍梨等所說自然成第一義唯垂大悲開
發迷悶佛告阿難即如城中演若達多狂性因緣若
得滅除則不狂性自然而出因緣自然理窮於是阿
難演若達多頭本自然本自其然無然非自何因緣
故怖頭狂走若自然頭因緣故狂何不自然因緣故
失本頭不失狂怖妄出曾無變易何藉因緣本狂自
然本有狂怖未狂之際狂何所潛不狂自然頭本無

楞嚴經卷四第九葉

妄何為狂走若悟本頭識知狂走因緣自然俱為戲
論是故我言三緣斷故即菩提心菩提心生滅心
滅此但生滅滅生俱盡無功用道若有自然如是則
明自然心生滅心滅此亦生滅無生滅者名為自
然猶如世間諸相雜和成一體者名和合性非和合
者稱本然性本然非然和合非合然俱離離合俱
非此句方名無戲論法菩提涅槃尚在遙遠非汝歷
劫辛勤修證雖復憶持十方如來十二部經清淨妙
理如恒河沙祇益戲論汝雖談說因緣自然決定明
了人間稱汝多聞第一以此積劫多聞熏習不能免

離摩登伽難何須待我佛頂神呪摩登伽心媿大損
歇得阿那含於我法中成精進林愛河乾枯令汝解
脫是故阿難汝雖歷劫憶持如來祕密妙嚴不如一
日修無漏業遠離世間憎愛二苦如摩登伽宿為媿
女由神呪力銷其愛欲法中今名性比丘尼與羅睺
母耶輸陀羅同悟宿因知歷世因貪愛為苦一念熏
修無漏善故或得出纏或蒙授記如何自欺尚留觀
聽阿難及諸大眾聞佛示誨疑惑銷除心悟實相身
意輕安得未曾有重復悲淚頂禮佛足長跪合掌而
白佛言無上大悲清淨寶王善開我心能以如是種

種因緣方便提獎引諸沈冥出於苦海世尊我今雖
承如是法音知如來藏妙覺明心徧十方界含育如
來十方國土清淨寶嚴妙覺王刹如來復責多聞無
功不逮修習我今猶如旅泊之人忽蒙天王賜與華
屋雖獲大宅要因門入唯願如來不捨大悲示我在
會諸蒙暗者捐捨小乘畢獲如來無餘涅槃本教心
路令有學者從何攝伏疇昔攀緣得陀羅尼入佛知
見作是語已五體投地在會一心任佛慈旨爾時世
尊哀愍會中緣覺聲聞於菩提心未自在者及為當
來佛滅度後末法眾生發菩提心開無上乘妙修行

路宣示阿難及諸大眾汝等決定發菩提心於佛如
來妙三摩提不生疲倦應當先明發覺初心二決定
義云何初心二義決定阿難第一義者汝等若欲指
捨聲聞修菩薩乘入佛知見應當審觀因地發心與
果地覺為同為異阿難若於因地以生滅心為本修
因而求佛乘不生不滅無有是處以是義故汝當照
明諸器世間可作之法皆從變滅阿難汝觀世間可
作之法誰為不壞然終不聞爛壞虛空何以故空非
可作由是始終無壞滅故則汝身中堅相為地潤濕
為水煖觸為火動搖為風由以四纏分汝甚圓妙覺

楞嚴經卷四第十一葉

明心為視為聽為覺為察從始入終五疊渾濁云何
為濁阿難譬如清水清潔本然即彼塵土灰沙之倫
本質箇礙二體法爾性不相循有世間人取彼土塵
投於淨水土失箇礙水亡清潔容貌汨然名之為濁
汝濁五重亦復如是阿難汝見虛空徧十方界空見
不分有空無體有見無覺相織妄成是第一重名為
劫濁汝身現搏四大為體見聞覺知壅令箇礙水火
風土旋令覺知相織妄成是第二重名為見濁又汝
心中憶識誦習性教知見容現六塵離塵無相離覺
無性相織妄成是第三重名煩惱濁又汝朝夕生滅

不停知見每欲留於世間業運每常遷於國土相織
妄成是第四重名眾生濁汝等見聞元無異性眾塵
障越無狀異生性中相知用中相背同異失準相織
妄成是第五重名為命濁阿難汝今欲令見聞覺知
遠契如來常樂我淨應當先擇死生根本依不生滅
圓湛性成以湛旋其虛妄滅生復還元覺得元明覺
無生滅性為因地心然後圓成果地修證如澄濁水
貯於靜器靜深不動沙土自沈清水現前名為初伏
客塵煩惱去泥純水名為永斷根本無明明相精純
一切變現不為煩惱皆合涅槃清淨妙德第二義者

楞嚴經卷四第十二葉

汝等必欲發菩提心於菩薩乘生大勇猛決定棄捐
諸有為相應當審詳煩惱根本以無始來發業潤生
誰作誰受阿難汝修菩提若不審觀煩惱根本則不
能知虛妄根塵何處顛倒處尚不知云何降伏取如
來位阿難汝觀世間解結之人不見所結云何知解
不聞虛空被汝墮裂何以故空無形相無結解故則
汝現前眼耳鼻舌及與身心六為賊媒自劫家寶由
此無始眾生世界生纏縛故於器世間不能超越阿
難云何名為眾生世界世為通流界為方位汝今當
知東西南北東南西南東北西北上下為界過去未

來現在為世方位有十流數有三一切眾生織妄相
成身中賢選世界相涉而此界性設雖十方定位可
明世間祇目東西南北上下無位中無定方四數必
明與世相涉三四三宛轉十二流變三疊一十百
千總括始終六根之中各各功德有千二百阿難汝
復於中克定優劣如眼觀見後暗前明前方全明後
方全暗左右旁觀三分之二統論所作功德不全三
分言功一分無德當知眼唯八百功德如耳周聽十
方無遺動若邇遙靜無邊際當知耳根圓滿一千二
百功德如鼻嗅聞通出入息有出有入而闕中交驗

楞嚴經卷四第十三葉

於鼻根三分闕一當知鼻唯八百功德如舌宣揚盡
諸世間出世間智言有方分理無窮盡當知舌根圓
滿一千二百功德如身覺觸識於違順合時能覺離
中不知離一合雙驗於身根三分闕一當知身唯八
百功德如意默容十方三世一切世間出世間法唯
聖與凡無不包容盡其涯際當知意根圓滿一千二
百功德阿難汝今欲逆生死欲流返窮流根至不生
滅當驗此等六受用根誰合誰離誰深誰淺誰為圓
通誰不圓滿若能於此悟圓通根逆彼無始織妄業
流得循圓通與不圓根日劫相倍我今備顯六湛圓

明本所功德數量如是隨汝詳擇其可入者吾當發
明令汝增進十方如來於十八界一一修行皆得圓
滿無上菩提於其中間亦無優劣但汝下劣未能於
中圓自在慧故我宣揚令汝但於一門深入入一無
妄彼六知根一時清淨阿難白佛言世尊云何逆流
深入一門能令六根一時清淨佛告阿難汝今已得
須陀洹果已滅三界眾生世間見所斷惑然猶未知
根中積生無始虛習彼習要因修所斷得何況此中
生住異滅分齊頭數今汝且觀現前六根為一為六
阿難若言一者耳何不見目何不聞頭奚不履足奚

楞嚴經卷四第十四葉

無語若此六根決定成六如我今會與汝宣揚微妙
法門汝之六根誰來領受阿難言我用耳聞佛言汝
耳自聞何關身口口來問義身起欽承是故應知非
一終六非六終一終不汝根元一元六阿難當知是
根非一非六由無始來顛倒論替故於圓湛一六義
生汝須陀洹雖得六銷猶未亡一如太虛空參合羣
器由器形異名之異空除器觀空說空為一彼太虛
空云何為汝成同不同何況更名是一非一則汝了
知六受用根亦復如是由明暗等二種相形於妙圓
中粘湛發見見精映色結色成根根元目為清淨四

大因名眼體如蒲萄朶浮根四塵流逸奔色由動靜
等二種相擊於妙圓中粘湛叢聽聽精映聲卷聲成
根根元目為清淨四大因名耳體如新卷葉浮根四
塵流逸奔聲由通塞等二種相叢於妙圓中粘湛叢
鼻鼻精映香納香成根根元目為清淨四大因名鼻
體如雙垂爪浮根四塵流逸奔香由恬變等二種相
叢於妙圓中粘湛叢嘗嘗精映味絞味成根根元目
為清淨四大因名舌體如初偃月浮根四塵流逸奔
味由離合等二種相摩於妙圓中粘湛叢覺覺精映
觸搏觸成根根元目為清淨四大因名身體如腰鼓

楞嚴經卷四第十五葉

賴浮根四塵流逸奔觸由生滅等二種相續於妙圓
中粘湛叢知知精映法攬法成根根元目為清淨四
大因名意思如幽室見浮根四塵流逸奔法阿難如
是六根由彼覺明有明明覺失彼精了粘妄叢光是
以汝今離暗離明無有見體離動離靜元無聽質無
通無塞巖性不生非變非恬嘗無所出不離不合覺
觸本無無滅無生了知安寄汝但不循動靜合離恬
變通塞生滅明暗如是十二諸有為相隨拔一根脫
粘內伏伏歸元真叢本明耀耀性叢明諸餘五粘應
拔圓脫不由前塵所起知見明不循根寄根明叢由

是六根互相為用阿難汝豈不知今此會中阿那律
陀無目而見跋難陀龍無耳而聽瓊伽神女非鼻聞
香驪梵鉢提異舌知味舜若多神無身覺觸如來光
中映令暫現既為風質其體元無諸滅盡定得寂聲
聞如此會中摩訶迦葉久滅意根圓明了知不因心
念阿難今汝諸根若圓拔已內瑩發光如是浮塵及
器世間諸變化相如湯銷冰應念化成無上知覺阿
難如彼世人聚見於眼若令急合暗相現前六根黯
然頭足相類彼人以手脩體外繞彼雖不見頭足一
辨知覺是同緣見因明暗成無見不明自發則諸暗

相永不能昏根塵既銷云何覺明不成圓妙阿難白
佛言世尊如佛說言因地覺心欲求常住要與果位
名目相應世尊如果位中菩提涅槃真如佛性菴摩
羅識空如來藏大圓鏡智是七種名稱謂雖別清淨
圓滿體性堅凝如金剛王常住不壞若此見聽離於
明暗動靜通塞畢竟無體猶如念心離於前塵本無
所有云何將此畢竟斷滅以為修因欲獲如來七常
住果世尊若離明暗見畢竟空如無前塵念自性滅
進退循環微細推求本無我心及我心所將誰立因
求無上覺如來先說湛精圓常違越誠言終成戲論

云何如來真實語者唯垂大慈開我蒙悟佛告阿難
汝學多聞未盡諸漏心中徒知顛倒所因真倒現前
實未能識恐汝誠心猶未信伏吾今試將塵俗諸事
當除汝疑即時如來勅羅睺羅擊鐘一聲問阿難言
汝今聞不阿難大眾俱言我聞鐘歇無聲佛又問言
汝今聞不阿難大眾俱言不聞時羅睺羅又擊一聲
佛又問言汝今聞不阿難大眾又言俱聞佛問阿難
汝云何聞云何不聞阿難大眾俱白佛言鐘聲若擊
則我得聞擊久聲銷音響雙絕則名無聞如來又勅
羅睺擊鐘問阿難言爾今聲不阿難大眾俱言有聲

楞嚴經卷四第十七葉

少選聲銷佛又問言爾今聲不阿難大眾答言無聲
有頃羅睺更來撞鐘佛又問言爾今聲不阿難大眾
俱言有聲佛問阿難汝云何聲云何無聲阿難大眾
俱白佛言鐘聲若擊則名有聲擊久聲銷音響雙絕
則名無聲佛語阿難及諸大眾汝今云何自語矯亂
大眾阿難俱時問佛我今云何名為矯亂佛言我問
汝聞汝則言聞又問汝聲汝則言聲唯聞與聲報答
無定如是云何不名矯亂阿難聲銷無響汝說無聞
若實無聞聞性已滅同於枯木鐘聲更擊汝云何知
知有知無自是聲塵或無或有豈彼聞性為汝有無

聞實云無誰知無者是故阿難聲於聞中自有生滅
非為汝聞聲生聲滅令汝聞性為有為無汝尚顛倒
惑聲為聞何怪昏迷以常為斷終不應言離諸動靜
閉塞開通說聞無性如重睡人眠熟沐枕其家有人
於彼睡時擣練舂米其人夢中聞舂擣聲別作他物
或為擊鼓或為撞鐘即於夢時自怪其鐘為木石響
於時忽寤適知杵音自告家人我心夢時惑以舂音
將為鼓響阿難是人夢中豈憶靜搖開閉通塞其形
雖寐聞性不昏縱汝形銷命光遷謝以性云何為汝
銷滅以諸眾生從無始來脩諸色聲逐念流轉曾不

楞嚴經卷四第十八葉

開悟性淨妙常不循所常逐諸生滅由是生生雜染
流轉若棄生滅守於真常常光現前根塵識心應時
銷落想相為塵識情為垢二俱遠離則汝法眼應時
清明云何不成無上知覺

大佛頂如來密因修證了義諸菩薩萬行首楞嚴經
卷第四

大佛頂如來密因修證了義諸菩薩萬行首楞嚴經
卷第五

唐天竺沙門般刺密帝譯

烏菴國沙門彌伽釋迦譯語

菩薩戒弟子前正議大夫同中書門下平章

事清河房融筆受

清桐城女子吳芝瑛寫本

阿難白佛言世尊如來雖說第二義門今觀世間解
結之人若不知其所結之元我信是人終不能解世
尊我及會中有學聲聞亦復如是從無始際與諸無

明俱滅俱生雖得如是多聞善根名為出家猶障日
瘡唯願大慈哀愍淪溺今日身心云何是結從何名
解亦令未來苦難眾生得免輪迴不落三有作是語
已普及大眾五體投地雨淚翹誠仰佛如來無上開
示爾時世尊憐愍阿難及諸會中諸有學者亦為未
來一切眾生為出世因作將來眼以閻浮檀紫金光
手摩阿難頂即時十方普佛世界六種震動微塵如
來住世界者各有寶光從其頂出其光同時於彼世
界來祇陀林灌如來頂是諸大眾得未曾有於是阿
難及諸大眾俱聞十方微塵如來異口同音告阿難

楞嚴經卷五第二葉

言善哉阿難汝欲識知俱生無明使汝輪轉生死結
根唯汝六根更無他物汝復欲知無上菩提令汝速
證安樂解脫寂靜妙常亦汝六根更非他物阿難雖
聞如是法音心猶未明瞽盲白佛云何令我生死輪
迴安樂妙常同是六根更非他物佛告阿難根塵同
源縛脫無二識性虛妄猶如空華阿難由塵發知因
根有相相見無性同於交蘆是故汝今知見立知即
無明本知見無見斯即涅槃無漏真淨云何是中更
容他物爾時世尊欲重宣此義而說偈言

真性有為空

緣生故如幻

無為無起滅

不實如空華 言妄顯諸真 妄真同二妄
猶非真非真 云何見所見 中間無實性
是故若交盧 結解同所因 聖凡無二路
汝觀交中性 空有二俱非 迷晦即無明
發明便解脫 解結因次第 六解一亦亡
根選擇圓通 入流成正覺 陀那微細識
習氣成暴流 真非真恐迷 我常不開演
自心取自心 非幻成幻法 不取無非幻
非幻尚不生 幻法云何立 是名妙蓮華
金剛王寶覺 如幻三摩提 彈指超無學

楞嚴經卷五第三葉

此阿毗達磨 十方薄伽梵 一路涅槃門
於是阿難及諸大眾聞佛如來無上慈誨祇夜伽陀
雜糅精瑩妙理清徹 心目開明歎未曾有阿難合掌
頂禮白佛我今聞佛無遮大悲性淨妙常真實法句
心猶未達六解一亡舒結倫次唯垂大慈再愍斯會
及與將來施以法音洗滌沈垢即時如來於師子坐
整涅槃僧歛僧伽梨攬七寶几引手於几取劫波羅
天所奉華巾於大眾前縱成一結示阿難言此名何
等阿難大眾俱白佛言此名為結於是如來縱疊華
巾又成一結重問阿難此名何等阿難大眾又白佛

言此亦名結如是倫次結盡華中總成六結一一結成皆取手中所成之結持問阿難此名何等阿難大眾亦復如是次第訓佛此名為結佛告阿難我初結中汝名為結此盡華中先實一條第二第三云何汝曹復名為結阿難白佛言世尊此寶臺華緝績成中雖本一體如我思維如來一結得一結名若百結成終名百結何況此中祇有六結終不至七亦不傳五云何如來祇許初時第二第三不名為結佛告阿難此寶華中汝知此中元止一條我六結時名有六結汝審觀察中體是同因結有異於意云何初結結成

楞嚴經卷五第四葉

名為第一如是乃至第六結生吾今欲將第六結名成第一不不也世尊六結若存斯第六名終非第一縱我歷生盡其明辯如何令是六結亂名佛言如是六結不同備顧本因一中所適令其雜亂終不得成則汝六根亦復如是畢竟同中生畢竟異佛告阿難汝必嫌此六結不成顛樂一成復云何得阿難言此結若存是非鋒起於中自生此結非彼彼結非此如來今日若總解除結若不生則無彼此尚不名一六云何成佛言六解一亡亦復如是由汝無始心性狂亂知見妄發發妄不息勞見發塵如勞目睛則有狂

華於湛精明無因亂起一切世間山河大地生死涅槃皆即狂勞顛倒華相阿難言以勞同結云何解除如來以手將所結中偏掣其左問阿難言如是解不不也世尊旋復以手偏牽右邊又問阿難如是解不不也世尊佛告阿難吾今以手左右各牽竟不能解汝設方便云何解成阿難白佛言世尊當於結心解即分散佛告阿難如是如是若欲除結當於結心阿難我說佛法從因緣生非取世間和合粗相如來發明世出世法知其本因隨所緣出如是乃至恒沙界外一滴之雨亦知頭數現前種種松直棘曲鵠白鳥

楞嚴經卷五第五葉

玄皆了元由是故阿難隨汝心中選擇六根根結若除塵相自滅諸妄銷亡不真何待阿難吾今問汝此劫波羅中六結現前同時解縈得同除不也世尊是結本以次第結生今日當須次第而解六結同體結不同時則結解時云何同除佛言六根解除亦復如是以根初解先得空空性圓明成法解脫解脫法已俱空不生是名菩薩從三摩地得無生忍阿難及諸大眾蒙佛開示慧覺圓通得無疑惑一時合掌頂禮雙足而白佛言我等今日身心皎然快得無礙雖復悟知一六亡義然猶未達圓通本根世尊我輩

飄零積劫孤露何心何慮預佛天倫如失乳兒忽遇
慈母若復因此際會道成所得密言還同本悟則與
未聞無有差別唯垂大悲惠我秘嚴成就如來寂後
開示作是語已五體投地退藏密機真佛冥授爾時
世尊普告眾中諸大菩薩及諸漏盡大阿羅漢汝等
菩薩及阿羅漢生我法中得成無學吾今問汝最初
發心悟十八界誰為圓通從何方便入三摩地憍陳
那五比丘即從座起頂禮佛足而白佛言我在鹿苑
及於雞園觀見如來寂初成道於佛音聲悟明四諦
佛問比丘我初稱解如來印我名阿若多妙音密圓

楞嚴經卷五第六葉

我於音聲得阿羅漢佛問圓通如我所證音聲為上
優波尼沙陀即從座起頂禮佛足而白佛言我亦觀
佛寂初成道觀不淨相生大厭離悟諸色性以從不
淨白骨微塵歸於虛空空色二無成無學道如來印
我名尼沙陀塵色既盡妙色密圓我從色相得阿羅
漢佛問圓通如我所證色因為上香嚴童子即從座
起頂禮佛足而白佛言我聞如來教我諦觀諸有為
相我時辭佛宴晦清齋見諸比丘燒沈水香香氣寂
然來入鼻中我觀此氣非木非空非烟非火去無所
著來無所從由是意銷散明無漏如來印我得香嚴

彌塵氣條滅妙香密圓我從香巖得阿羅漢佛問圓
通如我所證香巖為上藥王藥上二法王子并在會
中五百梵天即從座起頂禮佛足而白佛言我無始
劫為世良醫口中嘗以娑婆世界草木金石名數凡
有十萬八千如是悉知苦醋鹹淡甘辛等味并諸和
合俱生變異是冷是熱有毒無毒悉能徧知承事如
來了知味性非空非有非即身心非離身心分別味
因從是開悟蒙佛如來印我昆季藥王藥上二菩薩
名今於會中為法王子因味覺明位登菩薩佛問圓
通如我所證味因為上跋陀婆羅并其同伴十六開

楞嚴經卷五第七葉

士即從座起頂禮佛足而白佛言我等先於威音王
佛聞法出家於浴僧時隨例入室忽悟水因既不洗
塵亦不洗體中間安然得無所有宿習無忘乃至今
時從佛出家今得無學彼佛名我跋陀婆羅妙觸宣
明成佛子往佛問圓通如我所證觸因為上摩訶迦
葉及紫金光比丘尼等即從座起頂禮佛足而白佛
言我於往劫於此界中有佛出世名日月燈我得親
近聞法修學佛滅度後供養舍利然燈續明以紫光
金塗佛形像自爾已來世生生身常圓滿紫金光
聚此紫金光比丘尼等即我眷屬同時發心我觀世

聞六塵變壞唯以空寂修於滅盡身心乃能度百千劫猶如彈指我以空法成阿羅漢世尊說我頭陀為寂妙法開明銷滅諸漏佛問圓通如我所證法因為上阿那律陀即從座起頂禮佛足而白佛言我初出家常樂睡眠如來訶我為畜生類我聞佛訶啼泣自責七日不眠失其雙目世尊示我樂見照明金剛三昧我不因眼觀見十方精真洞然如觀掌果如來印我成阿羅漢佛問圓通如我所證旋見脩元斯為弟一周利樂特迦即從座起頂禮佛足而白佛言我闕誦持無多聞性寂初值佛聞法出家憶持如來一句

楞嚴經卷五第八葉

伽陀於一百日得前遺後得後遺前佛愍我愚教我安居調出入息我時觀息微細窮盡生住異滅諸行剎那其心豁然得大無礙乃至漏盡成阿羅漢住佛座下印成無學佛問圓通如我所證反息脩空斯為弟一憍梵鉢提即從座起頂禮佛足而白佛言我有口業於過去劫輕弄沙門世世生生有牛呵病如來示我一味清淨心地法門我得滅心入三摩地觀味之知非體非物應念得超世間諸漏內脫身心外遺世界遠離三有如鳥出籠離垢銷塵法眼清淨成阿羅漢如來親印登無學道佛問圓通如我所證還味

旋知斯為第一畢陵伽婆蹉即從座起頂禮佛足而
白佛言我初發心從佛入道數聞如來說諸世間不
可樂事乞食城中心思法門不覺路中毒刺傷足舉
身疼痛我念有知知此深痛雖覺覺痛覺清淨心無
痛痛覺我又思維如是一身富有雙覺攝念未久身
心忽空三七日中諸漏虛盡成阿羅漢得親印記發
明無學佛問圓通如我所證純覺遺身斯為第一須
菩提即從座起頂禮佛足而白佛言我曠劫來心得
無礙自憶受生如恒河沙初在母胎即知空寂如是
乃至十方成空亦令眾生證得空性蒙如來發性覺

楞嚴經卷五第九葉

真空空性圓明得阿羅漢頓入如來寶明空海同佛
知見印成無學解脫性空我為無上佛問圓通如我
所證諸相入非非所非盡旋法歸無斯為第一舍利
弗即從座起頂禮佛足而白佛言我曠劫來心見清
淨如是受生如恒河沙世出世間種種變化一見則
通獲無障礙我於路中逢迦葉波兄弟相逐宣說因
緣悟心無際從佛出家見覺明圓得大無畏成阿羅
漢為佛長子從佛口生從法化生佛問圓通如我所
證心見葢光極知見斯為第一普賢菩薩即從座
起頂禮佛足而白佛言我已曾與恒沙如來為法王

子十方如來教其弟子菩薩根者修普賢行從我立
名世尊我用心聞分別眾生所有知見若於他方恒
沙界外有一眾生心中發明普賢行者我於爾時乘
六牙琴分身百千皆至其處縱彼障深未得見我我
與其人暗中摩頂擁護安慰令其成就佛問圓通我
說本因心聞發明分別自在斯為第一孫陀羅難陀
即從座起頂禮佛足而白佛言我初出家從佛入道
雖具戒律於三摩地心常散動未獲無漏世尊教我
及俱絺羅觀鼻端白我初諦觀經三七日見鼻中氣
出入如烟身心內明圓洞世界徧成虛淨猶如瑤瑤

楞嚴經卷五第十葉

烟相漸銷鼻息成白心開漏盡諸出入息化為光明
照十方界得阿羅漢世尊記我當得菩提佛問圓通
我以銷息息久發明明圓滅漏斯為第一富樓那彌
多羅尼子即從座起頂禮佛足而白佛言我曠劫來
辯才無礙宣說苦空深達實相如是乃至恒沙如來
秘密法門我於眾中微妙開示得無所畏世尊知我
有大辯才以音聲輪教我發揚我於佛前助佛轉輪
因師子吼成阿羅漢世尊印我說法無上佛問圓通
我以法音降伏魔怨銷滅諸漏斯為第一優波離即
從座起頂禮佛足而白佛言我親隨佛踰城出家親

觀如來六年勤苦親見如來降伏諸魔制諸外道解
脫世間貪欲諸漏承佛教戒如是乃至三千威儀八
萬微細性業遮業悉皆清淨身心寂滅成阿羅漢我
是如來眾中綱紀親印我心持戒修身眾推為上佛
問圓通我以執身身得自在次第執心心得通達然
後身心一切通利斯為第一夫目捷連即從座起頂
禮佛足而白佛言我初於路乞食逢遇優樓頻螺伽
耶那提三迦葉波宣說如來因緣深義我頓發心得
大通達如來惠我袈裟著身須髮自落我遊十方得
無罣礙神通發明推為無上成阿羅漢甯唯世尊十

楞嚴經卷五第十一葉

方如來歎我神力圓明清淨自在無畏佛問圓通我
以旋湛心光發宣如澄濁流久成清瑩斯為第一烏
芻瑟摩於如來前合掌頂禮佛之雙足而白佛言我
常先憶久遠劫前性多貪欲有佛出世名曰空王說
多姦人成猛火聚教我編觀百骸四肢諸冷煖氣神
光內凝化多姦心成智慧火從是諸佛皆呼召我名
為火頭我以火光三昧力故成阿羅漢心發大願諸
佛成道我為力士親伏魔怨佛問圓通我以諦觀身
心煖觸無礙流通諸漏既銷生大寶鏡登無上覺斯
為第一持地菩薩即從座起頂禮佛足而白佛言我

念往昔普光如來出現於世我為比丘常於一切要
路津口田地險隘有不如法妨損車馬我皆平填或
作橋梁或負沙土如是勤苦經無量佛出現於世或
有眾生於闍闔處要人擊物我先為擊至其所詣放
物即行不取其直毗舍浮佛現在世時世多饑荒我
為負人無問遠近唯取一錢或有車牛被於泥溺我
有神力為其推輪拔其苦惱時國大王延佛設齋我
於爾時平地待佛毗舍如來摩頂謂我當平心地則
世界地一切皆平我即心開見身微塵與造世界所
有微塵等無差別微塵自性不相觸摩乃至刀兵亦

楞嚴經卷五第十二葉

無所觸我於法性悟無生忍成阿羅漢迴心今入菩
薩位中聞諸如來宣妙蓮華佛知見地我先證明而
為上首佛問圓通我以諦觀身界二塵等無差別本
如來藏虛妄發塵塵銷智圓成無上道斯為第一月
光童子即從座起頂禮佛足而白佛言我憶往昔恒
河沙劫有佛出世名為水天教諸菩薩修習水觀入
三摩地觀於身中水性無奪初從涕唾如是窮盡津
液精血大小便利身中旋復水性一同見水身中與
世界外浮幢王剎諸香水海等無差別我於是時初
成此觀但見其水未得無身當為比丘室中安禪我

有弟子闚窓觀室唯見清水編在室中了無所見童
稚無知取一瓦礫投於水內激水作聲顧盼而去我
出定後頓覺心痛如舍利弗遭違害我自思唯今
我已得阿羅漢道久離病緣云何今日忽生心痛將
無退失爾時童子捷來我前說如上事我則告言汝
更見水可即開門入此水中除去瓦礫童子奉教後
入定時還復見水瓦礫宛然開門除出我後出定身
質如初逢無量佛如是至於山海自在通王如來方
得亡身與十方界諸香水海性合真空無二無別今
於如來得童真名預菩薩會佛問圓通我以水性一

楞嚴經卷五第十三葉

味流通得無生忍圓滿菩提斯為第一瑠璃光法王
子即從座起頂禮佛足而白佛言我憶往昔經恒沙
劫有佛出世名無量聲開示菩薩本覺妙明觀此世
界及眾生身皆是妄緣風力所轉我於爾時觀界安
立觀世動時觀身動止觀心動念諸動無二等無差
別我時覺了此羣動性來無所從去無所至十方微
塵顛倒眾生同一虛妄如是乃至三千大千一世界
內所有眾生如一器中貯百蚊蚋啾亂鳴於分寸
中鼓發狂鬧逢佛未幾得無生忍爾時心開乃見東
方不動佛國為法王子事十方佛身心發光洞徹無

礙佛問圓通我以觀察風力無依悟菩提心入三摩地合十方佛傳一妙心斯為第一虛空藏菩薩即從座起頂禮佛足而白佛言我與如來定光佛所得無邊身爾時手執四大寶珠照明十方微塵佛刹化成虛空又於自心現大圓鏡內放十種微妙寶光流灌十方盡虛空際諸幢王刹來入鏡內涉入我身身同虛空不相妨礙身能善入微塵國土廣行佛事得大隨順以大神力由我諦觀四大無依妄想生滅虛空無二佛國本同於同發明得無生忍佛問圓通我以觀察虛空無邊入三摩地妙力圓明斯為第一彌勒

楞嚴經卷五第十四葉

菩薩即從座起頂禮佛足而白佛言我憶往昔經微塵劫有佛出世名日月燈明我從彼佛而得出家心重世名好遊族姓爾時世尊教我修習唯心識定入三摩地歷劫以來以此三昧事恒沙佛求世名心歇滅無有至然燈佛出現於世我乃得成無上妙圓識心三昧乃至盡空如來國土淨穢有無皆是我心變化所現世尊我了如是唯心識故識性流出無量如來今得授記次補佛處佛問圓通我以諦觀十方唯識識心圓明入圓成實遠離依他及徧計執得無生忍斯為第一大勢至法王子與其同倫五十二菩薩

即從座起頂禮佛足而白佛言我憶往昔恒河沙劫
有佛出世名無量光十二如來相繼一劫其最後佛
名超日月光彼佛教我念佛三昧辟如有人一專為
憶一人專忘如是二人若逢不逢或見非見二人相
憶二憶念深如是乃至後生至生同於形影不相乖
異十方如來憐念眾生如母憶子若子逃逝雖憶何
為子若憶母如母憶時母子歷生不相違遠若眾生
心憶佛念佛現前當來必定見佛去佛不遠不假方
便自得心開如染香人身有香氣此則名曰香光莊
嚴我本因地以念佛心入無生忍今於此界攝念佛

楞嚴經卷五第十五葉

人歸於淨土佛問圓通我無選擇都攝六根淨念相
繼得三摩地斯為第一
大佛頂如來密因修證了義諸菩薩萬行首楞嚴經
卷第五

觀音樓

自甲辰中冬侍夫子出都移家海上忽五年課兒
女之暇間一弄翰去年夏嘗為萬國賽珍會售楹帖
助振餘則自張堂室聊見興寄聞不得已而有所貽
非義有難却即意在表揚要之不數也今秋八月
南湖新居成夫子流連湖上旬日而返為芝瑛言曰
吾昨登北高峯俯瞰諸天凡想都盡恨其間殿宇高
堵四周限障眼界盡殺物華於是蒼茫四顧發一大
願須於其巔造十三級浮圖由下而上級刻大佛頂
首楞嚴經一卷十級經盡於十一級作井字室中具
几案床榻茗彝楮墨春秋佳日游人登眺得少憩焉

觀音樓

更上則刻造塔因緣及出財者名姓事略極頂乃仿
龍門造像樞吾兩人及出財諸長者居士父母小影
即塔下闢石屋鍵本經墨蹟其中後世將必有寶貴
之者即今勝法不絕如綫故令人寫經功德尤不可
思議汝能為我寫一通者將徧歷海內募資成塔蓋
聖湖諸勝曠絕無有逾北高峯者而年來胸息繁吾
心月者亦無有過於首楞嚴經也一笑而罷秋臆靜
坐試一為之八月廿四日始日課兩葉迄重陽前一
夕第一二卷寫訖中間研女腹疾夫子病熱幾殆而
芝瑛亦患咯血遂舉家就醫病院俄而秋瑾卒墓事

起芝瑛力疾移歸待罪曹渡以天之福夫子病起研
女漸復芝瑛咯血幸稍止而粹奉

國諱

兩宮賓天愴恸震悼百憂迸集其間旋寫旋輟至卷
三第十葉乃取前成者獻之泲陽尚書意將自此輟
事矣顧蒙尚書迭函慰問京師協和女書院長美
國參美德女士聞有官事函電紛馳感然若唯恐芝
瑛前死者為詳述事略徧登函報又俟官嚴先生適
莅海上更為之傳芝瑛藐一嬰是重戾獨承中外鉅
人長德保愛存問如此則不自知淚下如雨也乃於



冬月朔日復自散願仍日課二葉少或一葉無稍間
 斷至今成弟三四五卷合所前寫已粲然半部矣卷
 恒天寒量鹽數米刻自程力終朝皇、循閱一通覺
 恆心滿意百步二三四憶潭柘寓經昫又七載目光
 腕力月殊歲逆夫子乃謂今茲所作道勁勝前其阿
 所好者耶則未審下五卷成時將復如何也
 戊申臘八日芝瑛自識於海上之帆影樓



光緒三十四年臘八日印行

必	翻	所	版
究	印	有	權



大佛頂首楞嚴經上冊



卷第五 定價銀洋叁圓

寫經者桐城女子吳芝瑛

發行所 浙江省西湖小萬柳堂

寄售處 上海漢口廣東文明書局
 北京天津奉天





252

